

汪穰卿先生遺文



060-3127

期 志

上海图书馆藏书




A541 212 0014 5647B



汪穰卿先生

遺文

姜殿揚題



總目

第一

時務報論說彙錄

第二

芻言報論說擷粹

第三

書牘輯存





時務報論說彙錄目錄

中國自強策上

中國自強策中

中國自強策下

論今日中國當以知懼知恥爲本

以愛力轉國運說

論中國求富強宜籌易行之法

商戰論

論華民宜速籌自相保護之法

論將來必至之勢

論宜令全國講求武事

按尙有論中國參用民權之利益及論膠州被占事二篇已列入傳記內

茲不複錄



汪穰卿先生遺文 時務報論說彙錄

弟 詒 年 纂 輯

中國自強策上

錄 光緒二十二年八月初一日時務報


事至今日危迫極矣挫於日迫於俄侮辱於英教案蜂起回匪蠢動兵變民變之事不一而足而瓜分中國之說西報屢載之西人屢言之雖至愚之人亦知其殆然而廟堂無定策中外無定議舊弊未一除新猷未一布則非安於不爲卽以爲無策也夫安於不爲則無論矣以爲無策尙未然也夫中國在今日猶以一羊處羣虎之交曾不足以累其牙爪然而不遽動者羣雄角立未有所歸故艱於發難又無端戕人命敗商務又西人所不欲爲故猶遲回以待之我苟能自振則西人之於我亦猶其於日本耳惟我永不自振則彼惟恐爲人所得必將爭先以取之然則我國振興之政不於今日則無及矣夫中國利之宜興弊之宜除誰不知之而卒無定論者蓋食於弊者太多則必多爲之說以亂之多出其途以撓之蓋非不明不強之患而由於權無所歸則無人焉爲發光與

力之地也夫國朝承明之後懲於擅權朋黨之禍故執政之臣名曰軍機大臣人多而權不一但能唯諾於上前而不能堅持其意也但能恭擬諭旨而不能自發號令也然則苟欲聚其權以辦庶務舍立相莫由矣顧今日而驟然立相竊恐但有牽掣阻礙之苦而無行權決策之效則非先立議院不可矣或曰立相則不免擅權之慮開議院則權在下且散而不合徒滋論議於事非便不知有議院以與相相持則相不能擅權議院之人多矣且有議事舉人之權而無行事之權雖在下何病又議院論雖不一西例必擇其多者從之何囂雜之患且凡事初行必多漏略要在隨時審正耳若其成規則西人之議院章程可擇而行也至於開辦維新之政則有三大端焉一曰齊天下之論今天下之論至不一矣政府不擇而用之或朝暮更易或南北互異必當論定一格以便施行二曰慰天下及各國之望維新之政中國望之不應則離西國望之不應則侮宜明詔天下以舍舊從新之故而與各國立力保太平之約並方便予以權利且聘其賢豪與之參定法制則中外始有更新之望矣三曰安天下官吏士兵

之心維新政行則宗室旗丁冗員士人胥吏軍士皆有失所之慮始而以言語相煽惑繼而以全力相阻撓宜預籌安插之法宗室旗丁除作官當兵外或與以利益或弛其禁防新改立之官除總理之人必拔用能者其餘仍以舊官依班補敘學校新設必十年方能選用則從前士人在十年之內仍可補官胥吏軍士汰贖者可補充諸役如此則各人無失業之憂卽新政無阻撓之患矣然此但言創始之大要而未及其所行之事也

### 中國自強策中

中國自古獨立於亞洲之中而其外皆蠻夷視之素以君權爲主務以保世滋大爲宗旨故其治多禁防遏抑之制而少開拓廣充之意君恐臣之侵其權故不使之有纖毫之權恐臣下之結黨故務散其黨牽掣之使不得行其志錮蔽之使不得極其聰以天命怵之以鬼神懼之臣下承之以諱飾爲能以敷衍爲工以趨避諉卸爲巧其於民也但以壓制欺嚇爲事無復有誠意以相孚故吏習於弊混民安於刁翫士成於陋劣兵慣於譁瀆其齊民皆以閉戶不與外事




爲祕策以積財遺子孫爲得計故上下之大弊不出四事曰徇私曰惡直曰崇虛曰耽逸循習至久全國之民皆失自主之權無相爲之心上下隔絕彼此相離民視君父如陌路視同國若途人夫民之弱與離君所欲也積至今數千年乃受其大禍然則至今日而欲力反數千年之積弊以求與西人相角亦惟曰復民權崇公理而已其於官也汰冗職刪儀官使官各有事其教人也必使爲有用之學毋誤用其聰明其選人也必使以所學爲其官毋使用非所學其升補也必依其本職毋使朝此而夕彼其用人也厚其祿過則責故則斥勤奮則升遷而遞加其俸終身無失業之虞其定律也依罪爲斷必求可行無虛設之律無難行之例其罪人也訪緝密而治之寬其讞罪也稽罪而盡其辭其取於民也各以其資占稅毋倒置毋苛索其理財也使財歸實片毋糜於虛文毋漏於中飽昔之重文而輕武者今必使文武並重昔之優文士而輕吏治者今必以吏事爲急汰繁重以求其速捷去虛文以責其實效刪矯誣不實之談斥虛僞無理之事尙創作而賤安閒尙改變而賤守常以能開利源爲能以能創新

學爲優民性必求其宣達士氣必求其振奮昔之不使民與國事者今必與之共治昔之使民安於愚弱者今必使之極其明強務使內之權力在在足與外人相抵夫如是或可徼倖與各國相持然此但言其治道宗旨所在而未言辦法之實也

### 中國自強策下

請實言辦理之法今使上赫然下明詔告天下以力圖自振之故而使士民之明秀者互相舉爲議員使至京入議院而使中外大員自三品以上俱入上議院議院既立則立相以總內外之務立戶部以掌財用之出入立刑部以掌天下之獄訟及巡捕之事立商部以興商賈並掌稅則及考察工作物產之事立農部以教種植立外部以理交涉之事立兵部以掌兵事立工部以掌營造之事立郵政部以理道路河渠輪車輪船郵遞之事立民政部以掌各處地方之事立海部以掌海軍之事立教部以掌學校之事俟議員舉定相臣則由相臣自擇用諸部大臣及各省之長大臣及長又各舉其屬而皆決於議院十年之後





則議員及各官皆取於學校如西國之法設吏治局於京師徵天下賢能之吏使學習治法而分派之於各省以教諸地方官十年以後亦皆取之學校各省提鎮選於兵部而提鎮又遞選其屬十年之後始取之水陸武備學堂外部及出使大臣必取精西文通西事者十年之後始取之使才學堂京師立各種學校精選中西之能者教之以遞及於各省府州縣十年之後始取之師範學堂宰相與各大臣既舉定則遣使與各國立力保亞洲太平之約而大改上下內外之體制務從簡易悉去趨踰拜跪之節復立憲報館凡新政改革之意及中外交涉之故悉載之各種振興之政乘時並舉且捐納停冗員裁調濟安插之途廢資格班次之說止既無無事之官復無無官之事局中之人可因官以展其才局外之人可因事以責其效則職無不舉矣一事一官既無旁貸之方一官一事又無叢脞之慮則人勤於職矣在事之人有治事之權事外之人有監察之權而又有議員以鉗制之有日報以舉發之則官邪息矣厚俸祿而革陋規入官之日予以裝錢辭官之日予以恩俸或給終身或逮子孫辦公有費登

程有資則人興於廉矣改衙署之制速咨稟之法汰酬應之煩刪迎送之禮則官敏於事勤於察矣省府州縣各設議員以與官相抵官不能專其事則民困蘇矣因其事以設之官因其官以爲之學因其學以定所取入官之後非罪不斥心不枉耗才不虛糜人無失所官不易方則人知專所學矣取士多途學堂徧設由都會以及州縣由州縣以逮鄉閭人無廢才才無滯用則人勸於學矣釐定文字使歸淺近多撰教化之書使人易曉而徧設義塾教堂以教齊民則尋常之人皆可讀書明理矣凡刊刻書籍由官准駁其使用者準其專利則要用之書不日可得矣嚴戶口之冊定鄉里之制產業生死婚姻必注零戶必禁城鎮無雜處之虞鄉里無散居之慮而又徧設巡捕並設包探則逋逃清邪民無所匿矣律法從平無有徧頗重則絞殺輕則禁罰則罪易辦而情易得矣刑官治獄不兼他事復有會審以察其虛誣有律師以伸其辨說無刑求之苦無拖累之患則枉濫息矣吏皆有祿役皆受緡既無藉口之資卽無婪賄之弊如此則獄訟易矣有不率教者輒禁錮終身動其羞恥嚴其禁防則人恥於爲非



矣平道路濬江河開鐵軌通電報招商以成之借債以足之且路燈自來水在  
在設立使往來便捷消息靈通則用兵賑災經商行旅便矣礦務開銀行設然  
後鑄金銀銅三等之幣齊其輕重又製鈔票而禁兌換銀錢之店以便行使稅  
餉出入一律行用三年之後度新幣已足則悉禁舊錢則錢法行而人便於用  
矣製鈔幣立銀行正稅則嚴中飽則國用可足矣立商部定商制嚴賠償之法  
定詐騙之條除釐稅之苛捷水陸之途考求各國之物產察勘各地之工作內  
江外海準行輪舶能糾合公司者獎之商之成本重者許以補助則商勸矣能  
效法泰西製造各物者賞之並許專利能以新法製器者給以功牌則工勸矣  
稅以資算富重而貧輕稅以息計商多而農少蓄洩有資種植有法則民勸於  
田畝矣停無用之武試開水陸學堂令凡能武事者不與齊民齒則人競於武  
矣精選而厚其餉嚴教而重其防老休則廩以終身戰死則恤其子孫則兵皆  
能戰而平時不敢滋事矣防兵周於水陸兵將悉由考試定平時遣調之法定  
臨事招募之方炮械必精雷艦必備醫藥必贍兵法既嫻軍律尤峻則武備嚴

矣釐定祀典公私無名之祀悉行停止一切虛誣術數之說皆不得行則邪說息而正務舉矣設報館以達民隱凡中外交涉選舉獄訟報銷悉由官登之報新理新法及一切民間之事及其冤抑無不可登報則上下之情通矣定齊民之等級以有能者爲上有業者次之游惰爲下則民勤於所事矣而又設輿圖局以測全國之形勢設繙譯館以收各國之書籍設製造軍火局以給軍用如此行之十年國以富兵以強始可收回已失之權利除租界之法改進口之稅定管轄異邦人之制而與泰西各國相抗衡若夫施治之宜敍次之方新舊交替之法則當俟辦理之時議之非一時所能決也

論今日中國當以知懼知恥爲本

錄光緒二十二年十月十一日時務報

悲夫微歟今日之事也何悲焉悲失權也失權焉者非全舉一國之權而一時盡失之有積漸而失之者有不覺而失之者且不特上失之下亦失之不特官失之民亦失之至今日則已情現勢迫矣顧猶不知爲失權也但微覺轉動不便而已嗚呼豈知我之吭已盡爲人扼我之背已盡爲人拊哉是故租界闢而

我失轄地之權公堂設而我失用法之權西官治租界有專權而我失治民之權各國兵船可任意駛泊而我失口岸之權墨銀通行各埠中國銀錢不能一律行使而我失制幣之權西法賦稅重其入而輕其出我則反是則失稅權西法兩國之訟用刑從其輕者我則西人從輕比中人從重比則失刑權公法不得與在他國之利益不得均霑則失立國之權至若教人養人之權中國不力主持亦漸爲所侵竊甚且漸奪我用人之權又且奪我論議之權等是下之必至奪我志意之權及其生命之權夫與他國共立地球球之上而中國地大人衆又爲各國冠而蹉跌隕越一至於此嘻吁寧不懼歟

西人之所以脞削怵嚇我中國者以兵商爲大宗而其所以羽翼兵商者尤能堅忍刻苦聯絡黨類碁布星散於人之國中彼將力護其從我者而深斥其不從我者貴人能扶己者深獎譽之其異己者力毀謗之借己之國勢以壓人之官長復借官長之勢以壓齊民夫如是故吾國利弊纖悉盡爲所得而從者益衆彼又能取其國之善法以教養人不數年則才人學士將出其中且我民有

爲所長養者有爲所生全者方感激效死之不暇而我民猶寬然宴娛謂彼之說何足動人彼之爲此者特爲謀食計耳豈知彼之設心立法上之則欲執人之國權大之則欲制億兆人之死命逮至彼勢益盛方思起而謀自立之策則人聯絡而我散漫人堅忍而我疲脆彼欲去我若風之振槁嗚呼不自立而坐以俟者其效固必至於是也

始西人至中國猶震其風名以爲聲名文物之所在也已而察其政見其紀綱弛紊而不理過其野見其阡陌零亂而不整行其途見其道路污穢而不潔遇其貴人則情勢懜然遇其士民則事理昏然於是彼以爲可肆意相待者莫是若矣是以凡要挾誅求不能以待他國者獨能以待中國凡偏苛之令不能待他國之民者獨能以待中國之民於是有藉一案而求償金數倍者同一事而請改約章者華人殺西人則官革犯誅西人而若此則百不治一華人負西人債誅索不止其身西人而如是則一聽其官之所擬甚至愆期失約同一事而治之不同蓋彼見我官之輕其民也固謂我民之可以輕矣見我兵之擾民也

固以我民爲不妨擾矣見士民之侮其官長也固以官長爲可侮矣見我民之互相擠排互相爭奪也固知我民無相顧惜之心矣故雖西人之教素尙公平而卒至若是者蓋以爲待中國人則應如是也

西人善於經商所至之地輒能握其利權中國商人心計之工何遽讓西人然而稅務一層西人固已不費絲毫心力而操贏絀之大權矣我華商見利則羣趨而不思其後之難見害則捷避而不顧其徒之敗西人諗其如此故以整御散以堅敵脆以素嫻拒新習彼集公司則資本重大我則皆獨立也彼聯聲勢則消息靈通而我則隔絕也是以我雖行店林立而實則零碎湊集拾西餘剩受西挾制而莫可如何也

華人初見西人咸懷惡怒之心至今日則惡怒之心一變而爲信畏矣夫不問是非曲直而輒以惡怒之心待人非公理也至若不信畏己之人而信畏他人則尤異矣夫中國商人雖未盡可信然錢莊匯號固不亞於西人也而今則富貴人之金多託匯豐矣修造輪機中國非不能爲也而今則購辦之人必託耶



松矣同一器皿而必以整洋行字者爲貴同一貨物而必以來自西土者爲佳  
以上皆指中國器物實能與西人匹也若夫亂兵肆橫非口舌所能喻也乃亦覩西  
人而斂迹差役恣暴非禮讓所能禁也乃亦見西人而戰威無怪聞公使之驕  
橫而駭汗橫流遇西兵之嚴整而聞風遠避然則我民盍亦深思致此之由而  
思所以處將來乎

然此非一二人之懼而我中國四百兆人之公懼也非一二人之恥而我中國  
四百兆人之公恥也然則整頓之策但袖手而諉於上之人可乎整頓之策奈  
何曰相酌其制官革其政士益其學商擴其業工精其物如是而已吾意自去  
年以來必有大改其故轍以曉示天下者貴者必將羣協其權力以提挈萬綱  
富者必將羣委其貲財以創新萬事士必思力崇新學商必將共立公司工必  
將仿製新器報館徧設於各省學堂林立於列縣雖未覩維新之全模而士氣  
之奮民心之明將於此見之矣

夫四鄰環伺不足懼大變當前而怡然無所動斯爲可懼也割地償款不足恥



維新有機而懵然無所知爲可恥也今內之則敷衍錮蔽之見未嘗化外之則  
夤緣酬應之習不能免官書局奉旨重開矣而不敢昌言也學堂奉旨設立矣  
而未見定章也報館已奉旨允准矣而未見廣設也每議一事而部臣諉之疆  
臣疆臣諉諸紳士俄而以無款中輟矣每定一法則下屬俟諸長官長官決於  
內臣俄而以難行中止矣甚至駛行小輪則釐局阻之機器製造則重稅苦之  
推之學術商務工業未嘗有一事足當維新之目者詩曰不懟不悚百祿是總  
今之君子可謂不懟不悚矣

今使朝廷之臣相率而議必敝之政有司之官相率而發必阻之令舉國之人  
相率而治必廢之業商盡心開必閉之肆工竭力作不售之器聞者鮮不以爲  
笑矣顧觀於今則幾於是也然則今之人何異於舉手而自擊舉足而自蹴也  
然則今之人所作所爲何異於自棄絕也彼豈甘於如此哉一則由於不相顧  
一則由於不敢爲實則由於不能深知時勢之必然而姑與苟安而已且貧賤  
之人必曰我謀衣食之不暇何暇慮此然則當求諸富貴人矣貴者且曰我一

人竭力何所補不如及時培積爲子孫計富者且曰此他人所患耳我富人何慮此况他人固以保富爲事者我方不失顯榮嗚呼蓄志如是固無怪其如是矣

夫使果如富貴人所料則苟利於己雖大局移易何害雖然此豈果可得之數乎夫以他人爲可託而怡然以待其來此不仁之甚亦不智之甚抑知彼將不以顯虐而以暗傷不以驟芟而以漸減刑則異律官則異舉禮則異施商則異稅限其權利苛其禁防而意外之波累尤不可逆料我民亦盍按切事勢而一思之乎若以是言爲妄誕也則亦已矣若猶謂有萬一之當也則盍羣天下之心思才力而急籌之乎

是文成或咎其盡言恐爲聞者所怒余謂報館以直言爲盡職若畏蕙蓄縮而不吐則溺職矣且今日大勢居腹地者恐未能盡悉故不敢不盡言閱者諒之

以愛力轉國運說

錄光緒二十二年十月二十一日時務報



國者何也以其能自完固也質點相切而成物若未受空氣之改變而質點未相離則同類之物必無能損之理若金類然必已鏽蝕而後見殘於同類之金否則必有刃而後能錘銼之也若木類然必已腐朽而後見殘於同類之木否則必施以斲削而後能錘擊之也惟國亦然與他國同立於地球之上而獨見弱於他國則必其本質已有內離者矣內離者何失愛力是也夫起於相忘者終於相絕起於相愛者終於相成是故農與農相愛則通力合作轉相告語凡播種辨土可以新法行之矣工與工相愛則居肆成事互相勸勉凡購器造物事事可仿製矣商與商相愛則集貲易廣謀事易就凡公司行棧可如林而立矣士與士相愛則得失相較善否相示凡置書立會可並時而起矣官與官相愛則善法相告過失相救凡興利除弊之事可一旦行之矣疆臣相愛則救災捕盜設防治水之政不分畛域而彼此形跡之見可盡除矣卒與卒相愛則勝相讓敗相救而失伍棄軍之事可免矣將與將相愛則進止攻守互相應援而無彼此不相顧之患矣若夫上惟愛其下也則恩威互用而下必不忍蔽其上

官惟愛其民也則寬猛相濟而民必不忍疾視其官將惟愛其卒也則賞罰平均而卒必不忍輕棄其將且以全國之愛力愛其君則君益尊以全國之愛力愛其國則國益固以攻則克以戰則勝以守則完相愛而後能相羣相羣而後能相固是以愛力生強者也


夫責國之強必求器械之利士卒之勇將帥之武糧糈之足然是四者咸強國之末務也非本務也鷹之鷙由於嘴爪然使安嘴爪於燕雀必頓失其鷙則以嘴爪是也其所以用此嘴爪者非也鷹之全體固皆與嘴爪稱者也犀之猛由於齒角然使安齒角於麋鹿必頓失其猛則以齒角是也其所以用此齒角者非也犀之全體固皆與齒角副者也然則不以全體之愛力生強而但求強於整軍經武得乎項羽百戰百克而卒見滅於漢則以項羽之愛力不如漢也竇建德王世充之徒非不足以抗唐也而愛力不若唐則卒併於唐故英之保黨公黨設心不同而其爲英則同美之共和黨合衆黨議論不同而其欲富強美則同普己蹶而忽興法將亡而復振以國勢雖衰而愛力如故也蓋惟其相愛

也則必求所以相存求相存則必求所以自強是故農夫荷畚執鍤之時工人  
審曲面勢之時商人操奇計贏之時雖各營其私而心思所注射咸在於國雖  
以傭賃販豎之微咸不敢以國事爲後於是必思所以旋轉此國事者必思所  
以改革此政法者必思所以監察此用事之人者如此則雖欲不強不可得矣  
夫相愛也者非僅相愛而已也有相愛之意則行事相勸利弊相告進止相助  
艱阻相扶過相隱善相稱得相賀失相矜成功相期同類相助如此則不期成  
而自成矣相忘也者非僅相忘而已也有相忘之意則行事相阻利弊相隱進  
止相撓艱阻相傾過相訐善相誣得相惡失相幸成功相忌同類相離如此則  
不期於絕而自絕矣然則察善善敗之由審勸導之宜有國者宜何從焉

中國迭更艱阻而猶晏然無振作之意說者謂其守舊法也謂其多掣肘也謂  
其意見之歧也吾以爲由於不相愛也其仕者以爲我惟求敷衍抵塞終身不  
失官而已違恤其他士以爲我工制舉業卽足以自進何必勞心於他學商以  
爲我得新法當以自利何故公之人工以爲有利便之法宜祕不示人富者以

爲他人之危急無與於我何必勞心以爲人是以通商數十年來坐視強族之逼處國勢之危險利權之全失而未有共謀一事特創一業以開維新之景象者公司屢創而屢蹶商會雖有而如無至若學會公會則尤未有見端蓋西人之事皆賴衆人之心力而後能成之而中國則斷無合衆人心力以成一事者嗚呼愛力之失人心之亡也人心旣亡欲求國勢之能振將何所必乎

今夫中國之人不能食於故土流離海外幸而成立又不得保護有被侵奪於他國者如此則失愛力於我之旅民矣編戶之民賦稅未缺平居則官吏侵擾過當饑饉則任其轉徙而莫或過問如此則失愛力於我之居民矣工商以其巧力黽口而釐稅無定章保護無定法以致折閱失資無算如此則失愛力於工商矣隸名卒伍無事則尅其名糧有事則驅之前敵罷歸則任其流徙甚有爲此盜者如此則失愛力於武士矣士讀書求官然濫其取而狹其入官之途有窮老不能自存者如此則失愛力於士子矣求俊秀之人行之海外而資之學學成則不復問使求食於他國如此則失愛力於學人矣嘗以資藉得策名



仕版然屢改其銓選之方又不思所以維繫之以致不能活入口如此則失愛力於入仕之人矣有位於朝者既已委之事而寵之官然祿不足以給用使不能無他營如此則失愛力於在朝之人矣用是之故有權藉者專爲欺蔽侵漁而不顧其上富者寧懷金待寇而不肯以資軍實士以不與外事爲賢良民以苟免爲得計甚至比鄰不相知聞北方饑寇而南方鐘鼓貧賤之人聞富貴者之傾覆則引爲慶幸同國之人而相待乃如此環顧全球諸國未有如是者也夫愛力甚者先自愛其國內其國而外諸夏內諸夏而外彝狄春秋之義也是以春秋內大惡諱內大夫卒日凡以殊異於外也孔子曰不愛其親而愛他人者謂之悖德然則不愛己國之人而愛他國之人者獨不爲悖乎然而今日之事有異於此西商正稅值百抽五華商完釐則有例內之追求有例外之苛索西人日用物皆得不稅華人仿造乃復從而徵之華船挂洋旗則遇關卡無敢過問華店用西商牌號則雖越禁諭制無所妨礙華商託西人報關則無羈滯之苦反是則留難訛索將不可言狀延請西士不惜重金禮聘華人卽才技與



相齊等亦必薄其廩餼異其禮貌購物於西商惟所取求不敢與諧價入華人之肆則百端吹求必欲抑價短值而後快甚至有俟其折閱而冀其賤售者夫如是是驅舉國之人而使有外心也夫有外心則無內矣

夫以是解散渙釋之心而欲使成事是必一人可爲之事而後能成也若多至二三人則不能成矣又多至千百人及億兆人則愈不能成矣今使開行棧立公司皆千人以上練軍旅飭捕務皆萬人以上設學會建議院皆億兆人以上然而以彼此不相顧之人處之縱使明立規條選用賢哲亦必俄頃之間變故紛起局內則自相忌嫉局外則互相疑阻始而意見各執繼而彼此傾軋終且推諉避嫌而置正事於不問以軍則不武以財則不富以商則不能擴充以工則不能新異是何也以其不相愛也不相愛則相爭方自相敗壞之不暇何暇爲集事計然則有國者必行其愛之之心盡其愛之之實以生其相愛之意於是相切愈密相附愈堅可以致富可以致強舍是則何以焉

論中國求富強宜籌易行之法

錄光緒二十二年十一月初一日時務報

今必欲籌全局乎則必官同心士同志工商同法此徒滋論議而積久不能成一事矣今必欲正本源乎則必設議院定官制盡改政法此又徒滋論議而積久不能成一事矣小水之相會也非欲成大川也然而成大川之道在此矣衆聲之相和也非欲成大響也然而相和已多則成大響矣治水者自流伐木者披枝事固有由散而後得整由流而後及源者今天下雖未能一旦更變然內之部院外之督撫監司固有就其職所能及幡然以圖更變者其郎曹守令及其居鄉搢紳亦有就其力之所堪而毅然以成事爲己責者今且無言高遠也但就各人願力之所及隨其事之大小難易而合力以圖之則安知數年之後維新之盛業不於此基之哉

今日振興之策首在育人才育人才則必新學術新學術則必改科舉設學堂立學會建藏書樓然改科舉必將官制政法盡行改革非旦夕所能期泰西學堂之制最爲美備有大學堂中學堂小學堂而武備水師醫生律師又各有專門學堂別有師範學堂以教爲師者其學堂規制大者工費至數十萬鎊小者

亦數萬鎊延師購書之費稱是此必非一時之力所能舉辦泰西各種學問皆有學會蓋以講學之人多故學會可徧設也泰西之藏書樓藏書至數十百萬卷備各國文字之書是三者皆興國之盛舉也而非今日所能行也今日之務一在立小學堂堂中延一教西文師延一教算學師延一教中文並各種初學書之師而成材之願學者附入焉一開小學會凡士子欲講求時務政法算學輿地者可各聯一會購置會中應用書籍一月數聚自三人以上即可創辦以漸增加一建小藏書樓各州縣應釀貲購中西各種學問切要之書置諸樓中使人掌其籍願學者可就觀之而限以時刻一各處書院應兼試時務藝學不能作或作而不當者不得居前列一凡秀異之才無貲讀書者可以公中之財資之學學成則行之海外以博其學識一宜多撰問答體之各種啓蒙書附以圖說使觀者易曉一宜多譯西人專門學問政法之書由淺而深又多譯章程之書以便倣行一宜用西人燈影法講各種學問使人樂觀而易曉凡此數者自匹士以上卽有可爲之事而官紳亦可各以其權力所及而爲之此不待巨



款不勞聚論而卽可行者

振興之要又在阜財用阜財用則必興商務興商務則必定商政改稅則立公  
司鑄金幣設銀行開鐵路然定商政必由朝廷採取西法設立商部大臣無論  
變更成法非一時所能行且或立法未善或不得其人則益滋流弊西人稅則  
出口輕而進口重此非今日國勢所能行仿西法鑄金幣誠今日提挈商務之  
要舉然事旣創舉且國家賦入賦出之法將因之盡變亦難猝辦設銀行則可  
握利權阜商本而事亦浩大鐵路旣開則中原之物產可盡出程途輕捷轉運  
便利而非刻期可待之事立公司則資本殷實布置周徧可與西商相角然華  
人自爲者多罕能共濟凡茲數者皆繁重而難舉非可必之於今日者也今日  
之務宜籌商人能自行之法各業能自振之方一宜立商會凡通商大埠爲商  
務聚會之區者宜立總商會專考求商務盈虧之故而籌更變之策而各業又  
自立會凡美善之法必宜師之其疵病弊端必盡去之庶物易銷售而西人不  
能抑勒矣一宜仿泰西製造各物本國銷售使財不外溢並可漸行之各國一

宜擇中國之物爲西人所樂用者精其製造以便行銷一宜定專利之法使創造者不致有徒費之虞一凡新造之物宜減輕其釐稅一應由商會派人考求各處物產一應設商務報專報以上各款之事然商賈阜通貨賄者也而貨賄非造於人則出於地然則不講求農工而但求諸商務豈非務末而忘本乎故宜設驗工會凡通商大埠應立驗工會凡製作精工過於他肆及能自創新物者獎之或許專利又設務農會凡農蠶種畜之事悉心考求辨物土之宜求孳乳之法以上二事可隨地設之有所得則附登商務報各州縣行之各省行之不數年而物產豐饒利源推廣矣凡此數事人人可行事事可行無多待於上並不見掣於外苟行之數年未有不見富庶之效者也

至若禦外侮尊國權則必講武備然整頓水師陸軍延西將練洋操購船礮此皆國家之事非常人所當與聞若夫改武試則變更舊制難期准行繪輿圖則繁費不易行常人所可講求者一宜立兵學會凡夙負材勇之士宜入此會會中應購備各式槍礮及武備書籍以資考求一宜多譯書籍一宜選士之精細

者專考求修造鎗礮之法或竟入西國名廠中肄習一宜選士之有謀略者專考求西人行軍步伍行陣之法及其號令擊刺一宜考求中國沿海內地攻守險要之所在及敵人進兵之路凡若此者苟以精心毅力行之大固可備將帥之才小亦足備一方之患此則在下位者皆可勉力爲之者也

抑是三者固非煩勞難行之事然舊習不除則雖有良法美意亦必阻格不行中國舊習好矜己事而罕察外情一則以爲中國之舊法已善矣一則以爲我之行事已善矣如此則忠告不至無從取正一也好聽諛言而惡逆耳不知得諛多者受蔽亦愈甚二也怠於作事而妬人成功見他人有所造作輒以私意排詆之甚至甲作則乙斥之乙作則甲又斥之終於無成三也意見各執抗不相下寧敗成功不肯遷就四也退後之談非無正論及見當局則心中所不然及於理不合者皆置不言而專用揣測迎合之說五也見他人之得則思排擠見他人之失則思推避不相扶救六也祛是六失宜崇五善一宜虛心聽受二宜廣采直言三宜互相扶救四宜論列以實不得以私意非毀五宜作事必要

其成不得有所畏憚而又必立簡法以免紆回求速捷以懲迂緩勤事爲以防廢弛限時刻以定作息則庶乎諸務克舉而功效可覩矣

商戰論

錄光緒二十二年十一月十一日時務報

國立於地球之上咸以戰爭自存者也以戰自惕罔不興以不戰自逸罔不亡戰之具有三教以奪其民兵以奪其地商以奪其財是故未通商之前商與商自爲戰旣通商之後則合一國之商以與他國之商相戰然則商之持籌握算以與他國較錙銖猶其被甲執戈而爲國家効力於疆場也其貨物則其兵刃也其貲本則其餼糧也國家之待將卒必厚其糧糒而予以利器豈偏愛此將卒哉以爲是一國存亡所繫百姓生命所關不敢不致謹也今夫農盡力田畝或植材不以出地中之所產然非商則不能運而致之遠工取五行之精而制爲器用非商則不能銜於肆以得他人之貲且商之爲事常兵之爲事暫商之爲事繁兵之爲事寡商所赴之地多兵所赴之地少兵者備而不必用者也商者無日不用者也然則國家之當加意於商豈不甚重矣哉

商之所利貨物美貲本輕程途捷行銷廣四者而已顧四者非國家加力助之則不爲功不行激勸之法不定專利之條不嚴冒牌之禁則貨物不能美銀行不設稅則不減假貸之法不定則貲本不能輕鐵路不開輪船不廣內地不通盜賊不戢則程途不能捷不徧設公使領事於各國及其通商之埠不能以輪船載貨而致之他洲不能以兵船衛之不能以全國之權力保護之則行銷不能廣如是則全國之商不過持其舊法行迂曲之途而待銷於本境之內欲求商務遠駕於他國之上得乎

西國商務之極盛也以其保護之甚力也保護之道維何曰使之便利使之有權而已是以定錢式及金銀銅三品之價開官私銀行定匯票使用票輕出口之稅凡稅不與物價相比者得隨時改定開鐵路行輪船凡至他國者得載以己國之船而護之以兵輪又定開設公司之例定專利之條嚴冒牌之禁凡以使之便利也許商人設市館爲議論貿易及定價值之所又許立商會使得商禁約他國貨物之法他國之幣不得流入內地或恐礙本國貨之銷路則重進



口之稅恐礙本國之工作則輕出口之稅凡以使之有權也故西商之至各國求必得而謀必遂職是故也

夫使商人便利使商人有權所以保商也卽嚴治商之禁令釐剔商人之弊病亦所以保商也西國之治商也凡商家冊籍及存貨底單及進出款之簿皆有一定程式歲呈之官以便稽核凡商之章程必請於官官允其行必力保護之其行使銀行之票及保險之法皆有定章至若不得已而倒閉則官稽其存數而使之攤還不得有所偏倚又定報窮之令凡報窮者不得齒於其類若有意誑騙或經商不合法度而致倒他人之財則官得按法嚴治之店之夥友侵沒主人之財者皆嚴治其罪夫如是故商人皆慎重不敢爲非而彼此得相信相保也

今吾中國與西國交通以來兵則屢戰而不一勝條約則屢定而權利愈失西國之貨銷行者歲億萬計而有損無益之物雖闖入而莫之能禁財貨日失利源日涸然猶幸商人能忍受艱苦節省勤力以與西人相搏相持雖不能相抵

然尙十得五六而閩粵民之工商於南洋及美澳諸洲者每歲寄回之銀又十得二三故中國雖困乏尙得支持而國家關稅亦賴以取盈而且振饑則捐之商禦敵則捐之商有大工大役又捐之商而報効之款尙不在此列然則商固無負於國家也

嗚呼中國商人之困至今已極矣一不鑄金幣又不用銀幣之制致受西國鎊價之虧二銀錢價低昂不定致商人有受暗虧之慮三各省平色萬殊致受錢莊抑剋之虧四假貸抵押及存銀均無定法使商人運掉不靈五不明許商人立會致商人無自主之權六不設市館以定隨時公平之價七各業所立行規不與官相通官可任意廢去八不立專利之條致商人不敢出重貲創辦新業九不嚴禁冒牌使美劣得以混淆出重貲者不必能得利十無專治倒帳之章程致被倒者無可控訴十一有意虧倒及設計誑騙者不能盡治以法致市面大敗而奸猾之徒仍得公然出入官商之間十二凡夥友虧倒主人之貲官不能嚴治致有貲財者不敢放手營運十三無保水火險之行使商人得

保其貲財十四不能重進口稅而輕出口稅使中國貨物得暢銷於各國十五不開鐵路不廣設內河輪船使行程迂遠十六無逕運歐美洲之輪船使得載貨以之他國十七各國不設領事無兵輪駛行外洋使經商各國者得有保護權則內外倒置便利則中西互易困危已國之商而便利西國之商未有若今日者也

然猶曰力不足不能行也財不給不能辦也國權不足不能得之於西國也自秦漢以後政尙疏略若必使纖悉皆治之官恐轉叢弊也固也顧何以出口之貨不能減輕其稅乎釐局約俟軍務告竣停止今已逾約矣獨不可裁減之乎然猶曰償款方迫興作方繁國用方匱非輕徭薄賦之時也顧獨不能釐革其法制裁廠併征使商人得行輕捷之途乎今釐卡如織一水之地而抽釐十餘次驗票又十餘次一貨之稅而征之於未成材料之時又征之於已成器物之時物價之低昂不一也而稅則一成不變有始僅值百抽五者繼至十抽三四各局之衰旺不定也而稅額則有增無減致有強稅就額之弊尤可異者一國



之中而各省之章程不一一省之中而各局之章程又不一一局而前後之章程又不一至於以若干起稅及何物免稅皆無一定之章故尺布斗粟未嘗獲免日用之物未嘗見蠲甚至司釐卡之員溢額則得獎虧額則見責歲增則留差歲減則撤差如此有不腴削脂膏例外取盈以求稱上之意乎夫以各省督撫之明察豈不知此而因循不變者一則苦無安置冗員之地一則外銷之款無可開支嗚呼國家得一二而使民間失千萬不許明銷而俾暗取誠非計之得也

顧此猶制之自上以備國家之用商民不敢怨也假使承辦員役能體朝廷不得已之意一秉至公絕無留難則商民猶不甚困也然而蒞其事者大率負債積貲百計求說而後得此將於是清負將於是起家何暇他顧故其扼制商民之法至不忍言有得錢賣放之弊有大頭小尾之弊有得錢減貨之弊此猶病國而不病民也若夫銀則補水錢則補甲罰無限制稍不遂意則蹴壞其物以嚇之新鮮果物則故欲翻動以挾制之甚至故栽僞洋而迫其掉換且又商人

守卡而故與晏開商船乘潮而故與停留疾風甚雨而故與稽滯商人之貲財不顧也商人之身命不問也是以釐稅之入上得其一而下得其九此九成中官才二三耳司事頗得其三四而巡丁則得其五六夫縱千百虎狼以逐羊兔幾何不相將俱盡者而欲其能致勝得乎

顧中國前則以官剝商而商困今則以官侵商而商愈困莊子曰牧馬者去其害馬而已矣孟子曰所欲與之聚之所惡弗施爾也夫商之擇利不待教於官也今之經商宜以新法求利商人亦稔知也道在正商法保商權捷商途而已矣今之言治者動曰宜通官商之氣宜合官商之情於是有所曰官督商辦者有曰官商合股者有竟奪商人之事而畀之官者夫以官之積威商人安能與之較論於是豪猾之徒以中國之官權行西國之商法官本則昂物價以抵除而莫或過問也商本則暫以微利羈縻而莫敢與聞也遂以傾詐陰險之才行籠絡揜闔之術盡取天下之利權而歸之一己而商人愈困矣

縛勇士之手足而使與人鬪得乎桎梏勇將繫維健卒而使與人戰可乎今置

商人於牽掣拘攣之地抑鬱之鄉欲其能與各國之商爭勝是猶南行而北轍也夫以中國之商受中國之法以理論之固當盡行折閱無可牟利矣顧環觀華商亦頗有積日月之力以獲貲者蓋華商性能儉約刻苦無多求利不敢效西人之奢闊故拾遺掇剩稍能步西人之後塵且又有意外之幸焉蓋法不準情於是所司有行法外意而潛減貨值者又有因比較嚴切兩卡爭釐因減釐以招致商賈者又有船戶與司役通同或減名數或常年包賄若干以漏釐者又有託官船試船夾帶以邀免者又有掛洋旗託洋人報關以免苛政者嗚呼使商人失利於彼而得策於此此豈謀國者所忍聞乎然則今日欲振商務必自設商部始必自裁釐併徵始

論華民宜速籌自相保護之法

錄光緒二十三年十一月十一日時務報

嗚呼今日我中國之億兆人民其相率旅於格林礮之口門歟其殆於焚屋之燕沸釜之魚歟人爲刀俎吾爲魚肉人爲陷阱吾爲麋鹿而我之民人猶熙熙然貿貿然大率合男女而計之知時勢之危急者萬無一焉知其危急而欲思

所以圖維之者億兆無一焉夫如是故士無新學農無新植工無新藝商無新術仍舊習謬因循苟安而不知一轉瞬間卽將並其從前可以坐食畢世之業一旦將付之無何有之鄉而相與坐受摧剝蹂踐於外人豈不哀哉

夫今之人亦非盡無所聳懼也然而一則曰是運數使然非人力所能挽一則曰變革之權當操之上下民何能爲一則曰國家之事國家受之與民何涉嗚呼爲是數說者殆自比於癡頑不慧之人也夫遇焚者疾趨過壞屋者亟蒙其首初何嘗聽之天與上哉西人之治屬地也以嚴禁黨會爲要法以勒令遷徙爲深謀以使習己國語言文字爲至計其政治刑法名爲公平而一皆以扶同抑異爲事於是吾華人之旅西國屬地者商則處處後役則處先利則處輕罪則處處重訟則處曲工則處拙昔魯仲連之言曰秦若無己而帝則思變易諸侯之大臣廢其所謂不肖而予其所謂賢奪其所憎而予其所愛嗚呼今日西人奚啻什伯於秦而華人玩視若此豈不可憫歟

試更質言其至可慮者夫中國富人之所恃者除官商外鹽當關吏而已法制

一更則官與關吏不可以得利而向之食於關吏者一旦將夷爲平人則已去富人之半矣引岸之法改則鹽商之利失拍賣之法行則當商之利失且華商之所以獲利者得人自爲制不必聽命於上究其所爲多不合於公理票號銀號之流皆是也其他商人大率導源於農工夫畜植製造及成本之巨運動之捷中國皆遠遜於外人然則不數年後恐大宗之生意將盡歸於外人而零售之肆乃有中國人爲之其貧者猶可供役於外人其富者且將轉於溝壑之間嗟乎吾中國人何不及此時而慮之歟

夫日本之初與外人通商也與中國若雁行耳已而尊攘之事起已而變革之事起蓬蓬然勃勃然忽已躋於隆盛之治微特政法之盡變也卽工商農業及其技藝亦無不盡變凡西人能製之物彼無不能製也西人能爲之業彼無不能爲也西人能至之地彼無不能至也吾聞日本之經營商務固不遺餘力而互相保護之法亦無微不至凡各學校各工廠始延西人教習者一有日本人能及其藝業則卽去西人而延日本人而薪俸不減故學者競勉又昔有學操



舟術者術成將以爲船主英之驗船師不許詰其故曰日本人爲船主則保險公司將不肯保險日人聞之惡其挾制遂遽自籌款而立保險公司謂英人曰我船主所駕之船我國自能保險不煩汝驗也於是英人嗒然若喪而罷今則郵船會社之船主皆日本人爲之無復英人之迹嗚呼彼知自相保護則其政若此我民何熟視無覩乎

夫苟惕於將來之禍則必於目前先爲之計於是互相教誨互相資藉互相勸勉雖未能遽與外人相敵然而可以開智識裕生計却欺陵而遠謀至計亦卽在於是今試列其目於左

一曰宜多以官話創爲書報使凡稍識字者讀而知之不識字者亦聞人說而知之一曰識字書一曰名物書一曰儒教書一曰輿地書一曰中西史學書一曰儀則書一曰演義報以時事及論議井各種新法爲主又隨在用土音改正以便土人觀讀則人人皆可以知時事矣

一曰宜購各種學問之幻燈照片而講示之於四方西人於天文地理及植物



動物並蠶農各業莫不有幻燈照片大率燈每具三十餘元照片每張不過數十文及二三角耳假令購數十分而每爲之說因貸於人且令習演試誦論說卽徧走於各行省及各州縣市鎮於夜演試之併僱土人誦其說則遠近雅俗之人皆得知西人藝學之大凡矣

一曰宜多設鄉塾教中文外復教以西文使略識西文習西語而止使由此可入農務工藝各學堂

一曰宜設農會農報農務學堂農學試驗場並製肥料及殺蟲藥以勸導農民中國農業尙爲講求然泥於成法不思變通其器輕窳其法舊拙其於辨土宜興水利防災患之道咸未講求故必集東西之良法擇其可者試行之使遠近農民得所仿效而興地利

一曰宜立工藝會工藝報工藝學堂以勸導百工前人謂中國以有用之銀錢購西國奇技淫巧之物以爲至歎不知今日舉凡紗布針釘及諸日用之物無不購諸西國其爲可歎抑又甚焉且購而用之者比比皆是至其如何製造用

何物料成本如何則莫或過問也夫凡事必迭相更代中國絲茶之利日微自當講求各種可行銷之物以爲抵補之計而十餘年來卒未嘗見新出之貨物蓋中人狃於成見其富者以爲我按本計利已足用矣何必求此不可必之利哉其平常商人則曰我將本求利錙銖不可失何可求此難必之利哉故宜立會以講求之立報以宣示之立學堂以肄習之中國人多工賤以用人工機器爲宜當取易於行銷之物先爲肄習習成則又輾轉分教於各省俟用者衆則更自製機器以杜漏卮如此則中國日用之物中國足以自給且可行銷於各國矣

一曰宜立商會及商務報以興商務也西人於本國商務皆由商會主持凡官設商律定稅則皆必與商會相商故商會之權最大中國則不然凡各大埠皆西商爲主而華商聽其調度凡市面行情銀價一皆聽命於西人可不深悲也哉又中人之性欲速之念多而考求之功少故始則鹵莽而爲之觀其一敗遽倉卒而去之而市面且大爲震動又創辦之始彼此無從相知故每多同日並

建以致偕覆前此之倒閉者比比然也故必立會以集商議以重商權又必立報以考究各處行銷何物及各物之行情又凡新創行棧必登之報使人共曉如此則商務漸有起色矣

一曰於歐美大都市設立中國公司凡華商欲售物於外國者先寄樣於公司審其可售則使依樣發貨囤於公司及貨出則酌提若干爲行用其制約如在中國之洋行前時嘗有爲之者以折閱而止後遂無敢爲者然彼以立法不善用費過鉅所致非不可爲也蓋必如是則華貨始有行銷之法免抑勒之患至若特造輪船爲運貨之資則當在公司大效之後非一時所能辦矣

一曰宜設生物陳列所手製物陳列所機器製造物陳列所凡陳列所有五益比較以知其同異陳設以知其美惡巧者得所勸拙者知所效購者知所擇故東西各國皆競爲之中國各處物產至爲豐盛而卒無一總匯之處使人艱於考求故宜設陳列所於上海凡各處天生之物皆列於是其缺者隨時增入至若江西之磁器杭州之綢縐蘇湘之繡貨廣州之牙器皆精妙爲西人所豔稱

其餘尙有爲西人所不知者可於上海設手製物陳列所以觀示之中國機器之物必不能及西人若手製物猶有爲西人所不及者不得以此彌其缺陷也至機器製物現雖不多亦以漸而興但當區別仿造及獨創二者並由會中評察果係合式始准陳列並爲登報如此則人勸於興作矣

一曰宜於絲茶出口之地仿日本驗茶之法設立察驗絲茶所蓋絲茶等貨向無察驗之法於是苟且目前之商人不免以低偽各物攙雜其中西人藉此爲抑勒之地於是絲茶生意年虧歲減商人折耗日甚今宜由兩業中人設公所於出口之地選公正人嚴行簡汰凡絲商出口必先送公所察驗有不合者卽行剔去合式者給以已經察驗之憑據每擔約抽銀若干爲察驗之費凡出口大宗貨物之屢爲西人挑剔者皆可仿此如此則商業庶有起色而西人無從抑勒矣

以上諸事有益富教宜所在次第舉行然今日之事人才爲要學堂雖根本之事然由小學而中學而大學必十年方能學成故所宜急行培植人才之法又

有三端焉一曰宜設政務學堂聞法國有政務學堂由商人籌款開設內分法律交涉理財商務四大宗今宜仿其法選已成才之子弟入堂肄業專以辦事爲主不以學業爲要不三年而仿行西政可得其人矣

一曰宜選略通東文之子弟赴日本學堂肄習學業中國大學堂既籌建不易若赴歐美讀書不特資費太重且路太寫遠若日本則數日可達學中所需每歲才一百八十元脩金及內而所學亦不遜於歐美此固切近易行者也

一曰宜籌款使通識之士游歷內地及各國古人以游學爲重西人亦然故士之游歷者可取資於會中游歷既竣則以所得告於會中或著爲書或登之報日本間有之蓋游歷內地則可察物產審疾苦游歷外國則可察政俗益智識故不吝巨款也中國若能仿行是會則游歷之人漸多而風氣易開矣

以上各節皆民間所能自辦之事所慮智識不足以及此則力不能合不能持之以恆則不能持久事前則考察不精臨事則意見各執創辦既難未久旋罷誠可虞也故又宜立一總會選各地公正明通之人入其中凡地方有須興辦



之事必須由總會議其事之可辦與否並其人之能辦與否及其章程之善否然後許行並由總會助其籌款又辦事各有人而考求稽察則歸之總會如此則事有歸宿有稽考不至使庸濫之徒藉端斂貲而外人亦易於相信如是則民間智識漸開學業漸興商務漸盛有志之士欲有所施措則可得所藉手矣

論將來必至之勢

錄光緒二十四年五月十一日時務報

嗚呼事有必至理有固然此豈足諱者耶以吾國人未事弗思事至弗知當暑無冰當寒無衣則其得報之酷安有脫理而悖者乃曰今日之事與往昔異國瘁而家完君戚而民豫吾曹姑自怡樂以適天性其可也嘻斯言微特非人理其暗於情勢亦甚矣夫彼人之於我也有新舊交替之變有主客易位之變況我人識之明勿如志之堅定勿如心力之長勿如衆情之合勿如以不明不強散渙失勢之衆與彼相遇如持沙擊丸如握水禦石其何能濟今姑測彼未然歷言變狀豈非足使吾儕惴惴者乎一曰流品混淆地瘠流氓肆其簧鼓而良民將受其蹂躪也夫尊卑之分良賤之殊今日則如是耳若夫形勢稍異彼將



尊其所親愛而賤其所疎遠匪特此也且將刳其所不欲而強其所不堪至一切誅求戮辱之加將惟嬖褻之是聽而華人之禍始此矣一曰華人將自相擠壓慮與彼愈遠則受壓愈甚也夫以我民之短慮不審遠勢包圍者之絕我生也而慮逼處者之分我食也不能外爭以相活也而惟內逼以自寬也如彼筐中之蟹愈在下則受壓愈重而我民非死於彼實自相斃矣一曰將受土匪之害而華人將不能安其居也夫兵飢洊加生機復絕須臾難忍始思蠢動不足恢復徒滋擾累華人始則受其侵掠繼則被其牽連固已喘息不遑矣於是彼方將練我編氓勤茲匪類勝則彼坐受殲滅之功敗則彼獲償芟夷之願且匪類一起則禁防我民益甚玉石不分皆遭火烈金錫無別悉歸爐冶奔逃何地呼籲何從而種類且日銷矣一曰將受異俗之比較求同不能立異不可而將被人視爲異物也夫風俗不能無異同人情不能無愛憎同我則喜異我則惡人之性也是其所愛非其所憎又人之情也然則以勢而論我之風俗必在所非之列矣彼之記載報章凡言我國者多加誣詆之辭蓋欲坐以野蠻之實據

以便酬其噬吞之大願此甚可懼者也一曰華人日貧凡燕會禮節均不得與西人相抗而華人漸不爲彼所齒也夫以勢力之不敵勢必用酬應以相聯絡然西人宮室車馬衣服飲食之豪侈舉非華人所能敵華人始尙勉強繼漸不支於是情漸離分亦漸隔而益爲人所輕視矣試思以粵商之富且相聯合至數十年之久又有闢埠之功而在南洋各埠得列於議會者寥寥數人以是推之將來可知一曰凡須重資始成之學問華人貧不能學而一切新學無從興也凡事業工作無不根柢於學問而由小學以至大學至速須十年至廉亦須數千金近來華人學西文者纔至小成輒自求罷非彼不思上達蓋緣家累多重急求一事以冀餬口不能坐待十年更不能出此巨資也然則將來之事抑可知矣一曰凡須重資始成之事業華人貧不能舉而生機日感也泰西大工廠養人動至數萬少亦數千夫財力之巨賴有各種製造廠各種公司然其資本大率自數十萬至數百萬獨辦則無此巨資籌股亦苦於難齊而華人力所能爲者不過轉運之行棧零售之小店而欲以財富強種難矣一曰各種生計

淘汰大半而華民將無事可營也夫礦不能開廠不能設以力食者固無所餬口矣至若舊時之生業有爲彼法所禁者有以不及彼而不能復售者於是各難支撐漸自停罷舊者既多失業之虞新者更鮮覓食之所而窮愁之況不堪言狀矣一曰將受物貴之害而民困日甚也大凡工資薪俸之多少與其地財貨之多少有比例而物價之貴賤又與薪俸之多少有比例然果能劃境自守則此比例永不移動卽永足自養若夫萬國交通之時則地球上之物價勢必相準然泰西各國所以制百物之輕重者一曰輕重進出口稅一曰禁止進出口貨物中國雖不能然猶有禁米出口之權而內地又未盡通商是以通商數十年未大受物貴之害者以此也若以地屬他人則物之貴賤必與其國相準而工薪又不能驟增食物貴則無所得食各物貴則無所得用縱彼亦爲華民計設法保護然使纔及其半則華民已不能禁受矣一曰將受苛稅之害而華民貧無以應也夫彼人治屬地其修道路開溝渠治廨宇完守備固已然彼非能發其國帑也非能自捐其民也必將取之於吾民查彼印花有稅屋有稅

貨之進口有稅生業之利息有稅華民初到埠有稅甚至身稅犬馬稅之各色不一夫吾國釐卡雖虛而易爲脫漏彼則不然稅重而察嚴勢必驅吾殘疲之民而鞭笞以取盈吾民失業者多何堪此虛一曰將受苛法之害而華民將以法受誅也夫吾民之游寬網者曠千餘年矣何則我國之政刑峻而禁弛法繁而緝疎良民每得任意自便彼則不然其禁防多其巡緝嚴多則易犯嚴則易失入待其國人且然而況於施之新得之屬地乎而況於施之與他國屬地犬牙相錯者乎然則吾民之入阱者多矣一曰將不舉吾民爲官不舉吾民爲議員而華民遂無頭目也夫彼懼屬地民之有權必將多方以限制之大約秀異之人才使得爲書記幹力之人才使得爲巡捕包探而已則華人無足與其官長交通語言者更無論抗行矣一曰將不設大學堂於華而使華民無成材之望也夫彼人雖輕侮華人然亦深忌華人之秀異則遏抑防禁之術必無所不至大約但欲教之使成二三等人材足供彼驅策卽已足矣必不願多費款項養成人材以自貽患也一曰將不許華民研究武勇之事而使吾民永失爪牙之

用也聞法人之待滇邊土司悉收槍械入官令二家始得備一菜刀並不許有  
刀鋒然則彼於華民亦必如是而民練鄉團之屬一概不得舉行且必但練華  
民爲兵而不使學將帥之材而華民永無復興之望矣一曰殘虐之慘獨施於  
華民而吾屬將無唯類也夫彼人自號爲仁義其律法亦頗平允然治屬地之  
律與治本國之律不同況官能依律而巡捕包探未必盡依律也雖有國家狀  
師而吾民貧未必盡能延狀師也至若捕房之於役犯工頭之於工人逞其威  
虐何所不可從前秘魯糖寮虐待工人粵人撰成活地獄圖說一書慘難入目  
是亦歐人所爲也西法巡捕不得毆人而上海巡捕則肆行毆擊矣西法無枷  
杖之刑而法人治安南華民則特設枷杖矣以此推之實足滋懼一曰將不許  
設立報館并言國事之書使吾人耳目充塞且怨氣無所洩也大抵彼人待屬  
地之民以絕其智慧爲第一義閉其口爲第二義然後可役之如牛馬而驅之  
如奴隸以供其用以逞其欲波蘭印度成跡可數而吾人將化爲異物也一曰  
宗教文字語言浸以亡失而華人遂忘其本來也夫教者華人之心也語言文



字者華人之貌也彼得華地必將改其教易其語言文字而後彼可無後慮彼之欲逞其志也不以力強而以術誘不以驟逼而以漸移彼無他術不過使入彼教者多得保護利益而但知中國語言文字者無所得食而已今海外之民有甚通西國之學而不習華文者內地之民有求勝一訟脫一獄而亟歸彼教者如是則華人心貌並改不得爲華人矣以上十七條蓋勢處必然而猶恐未盡也試思彼時衣冠塗炭全地陸沈乞憐異種之王寄生他國之土我民之領袖則彼之隸圉也我之富人則彼之掬客工頭也於汝安乎於心忍乎且天下未有寄人宇下而克長自保者又未有全地屬人而尙能享其利益者夫明者察幾先智者防未然勇者恥下人與其束手而受縛何如奮足以圖功與其搶攘於入阱之後何如布置於未雨之時方今朝廷有丕振之機百度有聿新之象我民果能一德一心尙足自保若彼人則何有於我夫彼人者固欲坐我爲野蠻而自行其野蠻之道也

論宣令全國講求武事

錄光緒二十四年六月二十一日時務報



嗚呼我中國四萬萬人民其遂安然奴役於異種之人乎嗚呼我中國四萬萬人民其猶不甘心奴役於異種之人乎意不欲也以爲無術是謂愚知其可也默而聽之是謂忍以中國之右文輕武上下相與嬉酣沉溺於太平之中民皆柔靡脆戛惡死畏兵前年東事起命貴族爲將則親友慰問家屬相持而泣都中徵兵則哭不肯行涕泗橫頤者比比也閭巷之中聞兵事則駭而逃爆竹震於鄰則壯夫掩耳稚子疾走東南諸省至以子弟乘騎爲詬病其不嫻彎弓橫刀更無論矣而流俗又甚賤武人文武甲第相若而不相交也對品之官文武懸絕如天壤武職六品至爲文職扶輿而提鎮以下官苟無職任或不免笞杖馳驛之吏廝役之賤多敍以武職夫民俗之脆如彼國家之賤武又如此是故民不敢習武卽習之抑又無功夫國家所至之境界實全國人心所結撰也心注於強則強心注於巧則巧心注於弱拙則弱拙心注於衰亂則衰亂是故居上位者莫慎乎驅人心之所注也今諭旨固已言民團矣今宜明詔天下曰自今以後我君臣上下其悉惟武是事官以武爲尙任以武爲重學以武爲貴業

以武爲美其不能武事及臨鬪而避者爲上恥禮記曰戰陳無勇非孝也又死而不弔者三畏爲其首日本本此義以激勵其民不數年後民氣日奮士耽於武人皆能騎戶知執鎗徵兵有兵選將得將當戰能死不戰能避繪圖有人造械有人築壘掘濠有人有不翕然翔起而爲尙武之國者歟今吾俗方畏死特甚抑知避死必死不避死未必死忘死亦必死趨死必不死則試且踴躍淬厲與諸虎狼併命於一旦也

今國家宜速甄定水陸員弁相統率之制兵者全國之血脈也血脈須臾不相灌注卽死今兵部無管轄徵調之權而京中諸武職又全不與各督相關各省又各不相關海軍水師則南北洋不相呼應外海內江又不相聯屬又水陸軍多駐守一處而無巡遊各處之法是以兵事一起其調遣無一定之程度其統率無一定之權限臨事之人任事難而諉避易功未得賞罪未得罰者比比也今宜全仿泰西之制設水陸提督各一人統率全國軍務其設官駐守巡行之制一切參酌泰西及日本之法而盡易曩日之制則事權畫一責任有歸而不

至如昔時之疲敝矣

今宜漸更募兵之制而爲民兵也夫募兵權法也民兵常法也募兵之法似簡易而實不勝其弊其極則至民仇視兵兵漠視民且兵起則增募兵罷則散而爲盜曩事固歷歷可徵也又欲變弱國而爲強國非悉一國之民爲兵不可蓋悉民爲兵則民知以國爲事聞國之被侮則全國之民知恥聞敵之橫暴則全國之民知怒故國欲用民心莫善於改民兵今中國用募兵千餘年雖不能遽改然宜以漸易之先行之風氣強悍之地而後及其餘先徵編氓而後及士流其應徵而不願徵者則令呈繳免金數年之後以漸改正如此則民氣日強民志日固矣

今宜令民間速自籌辦民團以輔國家兵力之不足宜仿向來民團之制而變通之略如西國預備後備兵之法蓋向來民團之法縣自爲團鄉自爲團力分則薄分敵則爭勢散則亂統於縣則無權無所統則易橫向來民團之害多利少大率由此今縱不能合各省爲一團亦宜并一省爲一團宜令民間舉公正

任事之人主其事約先募千人而具二千人之服械選鄉間誠樸之人充之名曰額內團兵延教習教以西人行陣之法其未入選而自願按時赴習者則以其餘服械使與額內兵一齊操練名曰額外團兵一俟練成則皆次第之而給以賞牌因遣去額內兵之半而以額外兵補之復添募人以補額外兵之缺其人皆取之本省其兵雖隨散隨添而仍周行於各府之中其已散之人仍令每年赴操一次其月餉極重約每月十兩而留其半存之銀行每年赴操時則與以一年之息並給以赴操之餉死則令其繳獎牌而還其所存之銀凡一次無故不赴操則扣其存銀之半二次則盡罰去之若因事徵調不至亦盡罰之凡兵入選時皆令留影片凡有兵事來應募者則以獎牌並勘影片爲憑如此則不數年而全省之民可漸變爲強武矣

今宜准士林設立聯武會以習武事也中國非無強悍之俗然往往在民而不在于士尤不在紳富故宜令立會與民間一體操練選其尤者令得充出洋武備學生會中另備關涉武事之圖書器械令在會諸人得以展閱又令各省府州

縣互相聯屬庶聲氣相通而無隔閼之慮矣

今宜設獎武會以聯絡民間技勇之人也凡風氣強悍之地所在皆有專門技勇然向來與官兵不相通棄之則可惜絕之又可慮宜設會以聯絡之其會即在聯武會之中藉此以覘知魁偉傑特之士既可知彼施用之所宜復可知彼出入之所在於振刷民氣聯絡民情實爲至要

今宜設小製造廠以製快式鎗礮並令人學習製造之法今宜設繪圖局以審知當地形勢今宜設工兵學堂以供工程隊之用是三者獲效雖緩然實不可不辦之事宜以次行之三五年後亦可以奏績矣

地球諸國未有文弱如中國者今日種種被侮實由上下疲薻所致然則急要之圖惟在此矣竊不自揣撰成斯論前二段須俟國家爲之後四事則紳士可勉爲也民團一事法簡而尙易辦尤爲要圖各省官紳有俯採斯言者乎不勝朝夕企之

芻言報論說擷粹目錄

痛論頒行新律之宜慎

續論頒行新刑律之宜慎

讀楊度家族主義國家主義演說繫之以論

讀楊君演說家族主義國家主義之餘論

論不信史書之貽害

論吾國之不重廉恥

論吾國人之心理


論時俗之誕妄

借款造路平議

論借外款之宜慎

駁剪髮易服之反對論


讀議員論剪髮易服事簽注 摘錄





正名說

雜說



汪穰卿先生遺文 芻言報論說稿粹

弟 詒 年 纂 輯

痛論頒行新律之宜慎

今敢敬告我監國攝政王敬告我政府敬告我資政院之欽選民選議員曰今者朝廷命修律大臣修改刑律我輩草野之臣以爲改正舊律而已以爲舊律之不能行者輕之舊律之未嘗行者刪之而已然以今者道路所喧譁報章所騰播則非僅修改律法問題而爲變動三千年來立國基礎問題改變數千年相承習慣問題廢滅國教問題

吾國人勿謂吾國立國之基礎爲無足觀也試思自秦漢一統以後失抵抗力幾二千餘年雖屢生禍亂而風教不改故得一明主起而董理之無幾時已復夫以失抵抗力如此之久而能凝而不散植而不傾是必有物焉鎮定而聯之乃能如是也是何物也卽所謂禮教是也蓋古之聖人知爲治者莫如使民自爲治自爲治奈何則莫如使民相愛始欲使民相愛莫如使一家之人

自相愛始而所以維繫之者則一寄之於禮教蓋自父子兄弟夫婦相愛以及於宗族以及於鄉黨以及於國家遂使極大極散之人羣能團合而爲一自秦漢以後咸以此爲重六朝雖亂而君臣咸以此爲意綿綿延延以至於今雖世衰道微而民間猶賴宗法維繫得以循習苟安吾輩陰受其福而不自覺遂棄己之寶鼎而羨人之康瓠則請諸君勿震於列國之隆盛也試使任取一國使獨立於世界其能安擾如是乎試使倫敦紐約一旦撤去警察能如吾從前都城之鎮靜乎又假使歐美各國忽變而爲一統或全改爲民主實行弭兵主義試思彼時景象何如乎必至政黨爭於上無政府黨起於下禍亂大作有非人力所能撲滅者且今者各國非吾輩所目爲政治修明乎然禍亂之端幾無國蔑有奇慘之事歲必二三至其風俗偷薄姦偽滋彰見留學生所述西報所載指不勝屈而吾乃欲棄固有之善以就之其亦慎矣今修律大臣非果欲改善良之風俗也非果敢於變國教也殊不知禮教與刑律互相維繫未有刑律廢之而禮教能存之也今如所傳寡婦處女姦罪無治罪之條則編民必相謂朝

廷準許姦淫矣毆殺等罪不視服制爲輕重則謂朝廷許其平等矣至尊長施之幼弱與幼弱施之尊長齊等則謂父兄無管束卑幼之權而從前聽命家長之語可置之腦後矣夫此等習慣江浙繁華浮薄之地或幾忘之然內地則固崇奉也而鄉僻之地尤甚而北方各省尤甚今若以此等怪習灌注入之使之家自相鬪人自相角自來種禍促亂未有過於此者

今勿謂風俗敗壞之不易也自上海租界設立淫靡之風日甚自無知識之時流好以自由平等爲口實而暴慢之俗益長加以各處小學女學但事放縱不嚴管束故惡劣之風偏於家肆於鄉及其結果必至子弟既不宗仰其父兄父兄亦不顧戀其子弟而親戚宗族更無論矣夫如是而謂忽能合而愛其國者吾未之前聞也

今之人但知傾向於西輒欲吐棄一切以就之不知器械可改也規則法度可改也卽政體亦可改也而數千年相沿習之政教必不可改諸君疑吾言乎試觀各國變法有併變其教者乎截趾適屨蓋無過於此者

或謂刑禮不相關刑雖刪除而民家可各自嚴其禮防有何妨礙按此邪說也刑禮一氣相生未有刑律不注重而禮教猶能立者今新刑律未頒也而民間幾有家長不能管束其家之勢則以新說之主持者甚力也若更以國家之力助之則向來所有孝弟之說且一掃而空而方將引爲笑端謂此非二十世紀應有之言如此則生民之爲禍烈矣

吾但聞治國者就其向來政俗以策勵之未聞鏟除舊時政俗而別覓新種於他人也若謂取則異國亦當精加選擇況夫各國爲法亦不同且有因於從前習慣姑沿之者又有因於情勢不得已而爲之者而吾乃不辨宜否一概抄襲亦可怪矣且禮教中事日前卽有一疑難問題聞粵之諮議局呈請禁止自由結婚此在禮教所極應準許而與新法恐不免衝突不知傾向西法者將何術處之見宣統二年十月初六日芻言報

續論頒行新刑律之宜慎

前者不自揣量輒爲一文曰痛論頒行新刑律之宜慎聞時賢多不謂然者此



不怪也凡人之知識萬有不齊卽一人之身而前後多異其識見者何能強人之同我哉顧有一大問題焉敢以質諸時賢夫今者諸賢以羣策羣力力扶墜鼎其將使吾國重新鍛鍊成爲與歐美同一無二之國歟抑將使成爲歐美之外東方一大國使吾國人永永自知爲伏羲神農黃帝堯舜以來遞嬗之國吾人爲太古以來諸聖帝賢王之胄裔乎若曰直欲舍己而從人則不知應擇何國仿效之何則各國之教旣異而新出之學說又極紛旣難兼師又難偏擇至內之種種阻礙不必言矣若欲使爲地球上特出之一國則必求吾國精神之所寄而合吾今日諸賢豪之精神以赴之無有歧趨無有感志則世界上或猶有所謂吾國者在否則殆矣

余敢更以四語敬告諸君曰凡欲存我要在有我假其無我何有於存我見宣統二年十月二十一日芻言報

讀楊度家族主義國家主義演說繫之以論

余今細讀楊君之演說則知實欲廢中國向來習慣而以所謂國家主義者權

輸入之此事關係吾國前途禍福至巨故不敢不詳爲勘辨惜余淺學而日又促未能竟所欲言也

楊以歐洲各國之導其民爲國家主義吾國之教其民爲家族主義此說近似雖然吾觀周以前法制之書若周官等書載帝王誓誥若尙書等書聖賢教戒若論語等書具激勵民使忠於國者多矣限以家族二字西人言之我國不必承認也

至若國家主義吾不知西國國家承認此四字否又不知西國之用國家主義者固選擇而用之乎抑因勢之所在搏琬以至此乎吾意所謂國家主義家族主義者但謂其偏重則可謂其極端行此二主義則不可質言之曰身之外不能無家家之外不能無國由家而國乃自然之理假充楊君之論則謂西人絲毫不顧其家此固未必然則謂吾國人惟知有家亦未必然也

若謂吾國國民不知國家則何以吾國春秋戰國時各國相持至四五百年之久試攬史籍則如晉惠獲於秦之國中景狀齊頃敗於鞍之與國人互相慰撫

他若宋司城子罕之哭楊門介夫晉趙文子之謝絳縣老人又若申包胥復楚田單復齊宋被楚圍析骸易子而民不叛衛欲叛晉民願抗五伐之師而必雪君之辱魯辱國也而微虎一呼卽得壯士七百人直欲宵攻王舍民氣如此而謂無國家思想而能之乎

秦漢以後統一時多國家觀念自然薄弱然而著名大將其先在家中恂恂稱孝悌者乃指不勝屈至於古來史傳之孝子其後爲廉吏爲忠臣者亦不知凡幾然則吾國之禮教於家國二字實一絲不隔雖然法待人而行若無人扶持則漸有偏向之處此無論何國皆然非獨吾國也(中略)

以上所辨且姑置勿言然以今日事勢之迫促人才之寡乏與其盡棄前之習慣而行新政策不如順而導之庶易行也楊君疑不然乎試使楊君司京城內外警察持下一令令上下人等悉不得食向來之麵及飯而須食西國之麵包此較之楊君所云云難易迥殊矣然吾能決其必不能行也

且楊君所云云者楊君亦知今日者爲吾國禮教衰微之時非禮教振興之時

舉衰微之現象以咎禮教禮教不任咎也然雖禮教衰微而根柢則已深厚今必欲盡拔去之以求佳種於異國吾恐棄舊則易而謀新則難渙然豁然將成爲無統系無團結之國民雖有英賢無能爲力矣

吾國民之無國家思想也以二千年皆統一之時代無所用其國家思想也然而民氣之勃發乃隨在而見數十年來因受侮於外人受屈辱於外人不勝其忿而以生命隨之者無慮百十萬人惜乎上之人不能存養之利導之曉喻之使成強忍不拔之氣則上之罪也

且欲搏玩其國民使皆知以國家爲事此非坐言之所能致也亦非改一二政法之所能奏效也必也危事上先之辱事上先之勞苦患難上身爲之若越句踐之爲者如是斯民咸踔厲奮發悲憤慷慨而不能自己安有無國家思想之病者

今也上之對於其民則何如居處之逸也衣服之華也奴僕之豪縱也無有一二足徵其有憂念國家之意者而近則尤甚籌款多則上增公費矣新政府則

官多兼差矣百十萬之贓既明白發露而未嘗加刑誅也執事之吏朋淫無度而莫或過問也如是而以民之無國家思想歸咎於禮教無乃慎乎

夫治天下者有精神有跡象凡所謂法制皆跡象也必有精神而跡象乃有效不此之求而欲盡改數千年之習慣以得之恐不能勝則又造無數不根之談邪怪之說以遏抑異己疑誤社會嗚呼是何爲者歟

按此文成於倉卒殊不貫串亦無氣勢然意思大略如此閱者鑒之見宣統二年十一月初六日芻言報

讀楊君演說家族主義國家主義之餘論

前者吾輩於新刑律輒有論列非好爲異同也良以事至重大一或不慎則將陷全國於悲境故不憚反覆言之以冀當其責者謹慎將事耳

須知吾輩非謂舊律之不應改亦非謂新刑律之全不是惟謂立國之道有本原焉猶物之有重心也重心一移則全局改變此其禍福有非人所能逆料者故甚望預聞斯事者皆視爲重要之事而不肯輕心以掉至若綜古今之法則



較各國之異同則吾輩微特無此學識抑亦無此精力也

今姑勿論國家主義是否全善家族主義是否全不善然歐洲各國風俗之成就數千年矣卽吾國風俗之成就亦數千年矣今如楊君言欲改家族主義爲國家主義譬如刎己之頭而欲戴他人之頭以存立於天地之間雖然己之頭卽刎矣不可復續矣其如他人之頭不能戴而活何

夫國家之所以能用其民者以全國民有公共信仰之一事國家乃得潛驅而默策之耶教國之於耶穌教回教國之於摩罕默德皆是也我國全國所崇奉者卽爲禮教是正宜扶植而擴充之爲上之人先行蔑棄則一切舊時範圍皆視爲無足輕重人心一散而國隨以亡矣

以余觀之則吾國之所患不在種種名目而在精神卽如陽明之學吾國已均置之腦後然日本人自明末得傳陽明之學互相淬厲至明治維新而大收其效近來日俄海戰東鄉大將首著大功生平最服習陽明而吾國乃棄之如遺而今日乃欲求之異域無乃賤家雞而愛野鶩歟（下略）見宣統二年十一月

十一日芻言報

論不信史書之貽害

廉恥道喪風節掃地至今日而極矣其致此不一故而有一故焉種毒最深且烈則謂史書不足信一語盡之矣謂古史特善於渲染若舉今之某某稍加附會卽亦何讓古人又有謂古史全屬虛僞但可信其事之年月耳又有謂吾輩觀歷史覺某時治安某時濁亂某時人物多某時人物少實則全在作史者之意匠耳作史者肯爲裝點則雖亂政亟行而後人但知善狀無由知其昏濁否則反是此等詞說創之者一二人流傳及於全國於是引古爲鑑之說悉去於胸中而人人懷一不妨恣肆之心蓋世之所以導人於善而絕人於惡者名也史實爲名之標準今一力剷除使貪惡之徒皆有所恃而無恐毒民之甚固無過於此者見未刻稿

論吾國之不重廉恥

養成廉恥爲國家至要之事廉恥者氣節之基礎也無廉恥則安有氣節歐洲

各國極注意於此軍中人出與人鬪而傷無咎也若忍而歸則衆唾之矣或告  
余有俄人與親貴博親貴謂其換牌此人怒卽起請比劍此等事各國皆如是不  
以爲異民俗如是何至躬爲無恥吾國乃不然父兄於子弟師之於徒動以  
忍辱爲教晚近尤甚而官場乃愈甚嘗有一人平素語言侃侃氣勢甚盛後爲  
留學生監督一學生因爭事遽批其頰而其事在學生亦至無理人以爲彼必  
盡力治之不意彼托故至他處旋即回國此事輒隱不言噫侃侃者如此則庸  
庸者可知無怪庚子之役順民之條乃徧於京城也

廉恥喪盡之可怪固矣尤可怪者則頑惡無恥之人吾國乃容其生活於社會  
則更異矣例如張佩綸吳大澂唐景崧此三人者觀其前後歷史實可謂古今  
最無廉恥之人除失官外處社會中尊榮猶昔俾得頑然終其天年且張猶費  
權門吳猶得之湘撫唐則家居起洋樓居然大鄉紳體統某黨人以其小相攸  
助猶推戴之嗚呼是誠吾國之大羞也

按古人有不齒之法西人亦有之譯者呼爲罰去體面斯實懲惡之善法也

然吾國雖朝命不齒但使其人有資財勢要可聯絡則社會待之乃不減於常亦足異焉見未刻稿

齡年

按先生平時與人言論煦煦然惟恐傷人意故人咸樂就之獨至意有所不可則直斥其非不稍遜順其于欺世盜名之流則更抉摘其隱微以爲當世戒雖見嫉于友好結怨于貴要皆不顧也芻言報中所載各篇所指摘者若張佩綸若吳大澂若唐景崧雖已去官而餘燄猶存已固不以爲恥人亦無恥之者已如上所言矣此外則若馬口口若湯蟄仙則固負赫赫名無人敢訟言其非若德清俞某則人雖已逝而門弟子猶徧于各省羣推爲一代大儒而先生獨盡力抨擊不發其覆不已先生耿直之性情亦于此可見一斑矣以篇幅過繁不具錄

### 論吾國人之心理

吾國人常談輒曰隨便曰不拘曰彼此沒講究尋其意蓋導源於老莊而加入以釋氏平等之義其結果則蹈入於無規則無界限風俗之受害甚矣近西人

又有自由之說於是聞者不考西人自由之語何自而來自由之界限以何爲起訖而人人皆有自由二字存乎胸中一如得臻此境則吾人之幸福乃至不可思議至或者又以此擴充其隨便不拘之見解則視一切閑範人之事皆在應破除之列自男女長幼以及尊卑上下皆可無有而禍之及於事者多矣又彼等之意見不過及國內而止若夫國界則當各國帝國主義勃發固無從廢除也雖然內之一切既廢除矣而欲其獨尊視國內國外之界可乎則其潛消於內也久矣如此則終日口之所言手之所書雖亦從衆言愛國言保國權而一旦事勢大變則盡改其前說有如風之掃籜矣蓋數千年根著於人之心者今不拔去之而又附益之其不大受其毒也鮮矣見未刻稿

論時俗之誕妄

時局轉變未定兒童趨向未準是所賴於人之掖導者甚衆所謂掖導者則獎是而懲違實兩負其任而近來風氣但尙新穎不重倫理加以向來之俗工諛而忘規好異而棄舊客言某名流聲譽故震鑠海內或詣其賓館適其子從師



於館中年十三耳聞客言及其父遽云吾父惟英文佳耳其餘科學皆無門徑不足與今日學子競也客驚其言以語余且譽之余曰異哉是子敢於作如是言乎君之譽之也得無謂其能不私其親且以十三之童而能作是語爲可怪乎不知此等語必時有人言之此子特拾人牙後慧耳夫何足貴且不私其親而得人譽誰則不能充是言之必有賣其親以求譽者矣甚有賣其親以求富貴者矣近人於學西人之美德吾未之見也獨此等處初亦非西人所有而妄自爲之而又得譽於人無怪風俗之一落千丈矣有某貴人子列人表而置其父於下列於是無識之徒皆拍手大贊甚至呼爲犂牛之子數年後視之乃常兒也智識亦無大進吾甚爲贊之者愧也近來至有洋行買辦之子直對人謂其父爲三等奴隸者嗚呼上無厲行之教化下無矜式之師儒而羣靡於狂言濃譽之中無怪舉國後進被其毒矣

按前聞日本某君言其家當革新時代其父與叔皆黨於新而祖父則守舊怒二子異趣令依破腹法自裁某君又曰彼時常有是事此固偏宕太甚然

而返之吾國能有是乎阿徇而已矣勢利而已矣見宣統三年二月二十一

日芻言報

借款造路平議

幹路國有及借款造路之說余未以為非也蓋統觀各省於路事無不爭競延緩各為其私非改為國有則此交通最要之事何日能成且此窳彼良此貴彼賤何能統一所慮者吾國辦事人至難商辦固腐敗官辦亦誰可恃無已則鄭蘇堪方伯包工之說為最合宜雖然吾贊成鄭君此說而非鄭君之說咸在贊成之列也意所不然者不能不從容言之前者吾讀鄭君四大幹路之說帖而聘貽不已茲錄其說如下

為今日之中國計十年之內惟以吸收外資為救亡之要著十年以後惟以鐵道盡通為圖存之要著約而言之則借債造路而已宜指張恰伊黑川藏粵漢為四大幹路借債以十萬萬為度包工限年以成之世界諸國以侵略為主義者德俄日三國是也之三國者其財政皆處於竭蹶皆恃借債以行其發難之志使中國躑躅於一二年之內大舉借債交言之新局則三國借債為已任則各國必將躑躅於一二年之內大舉借債交言之新局則三國借債為所之謀必將大阻而侵略之策必將中挫而不能直前且包工與借債並議則所借之債悉入包工之手而無挪移吞蝕之患包工既定則包工公司以管

業爲務其用人購料必願就近取資於中國而不願遠求於本國其工程之限期亦必務求迅速而不願延緩以自貽虧折之害雖有最長於工工程之十萬萬外人得其三而中國得其所餘七也中國既藉大工以活民力而列國之甘於發難者又懷毒而不得發此誠釜底抽薪之策所謂十年之內以吸收外資爲救亡之要著者此也中國宣言立憲學新法者於東西各國取其政治法律現行之制將以試施於中國然以中國而言立憲其政略之煩重雖悉舉世界歷史之政治名家其學識經驗斷不足以決中國施行立憲之策何則形勢不同故也故使豪傑生於中國其所以改革中國必全爲開創之理想而決非沿襲列國現行之政治法律純爲保守理想者所可移而用也所謂開創之理想者何哉則大舉以造鐵路限以十數年內全國交通使至國之勢縮小而成一省一省之勢縮小而成一縣一縣之效安在乎蓋必至乎此日而後全國人民可合爲一羣即取列國之政治法律移而用之乃可推行而無礙其尤大者則養兵之費與行政之費不啻減十之九而民間工商業發達自有沛然莫禦之勢故鐵道者實創造世界改革社會最靈通之機械其力量之大有功効之捷非他器所可比例謂十年以後以鐵道盡通爲圖存之要著者此也

據此說借款至十萬萬亦可謂大借款矣試問財政竭蹶至今日之中國能任此艱鉅乎尤可異者則如此大議論而通篇未及還款之方法與夫抵押之物業豈外人不必抵押不問還款之方法而肯慨然以巨款相借乎若果如此則事更可慮此文大言炎炎而不思其究竟余竊不敢附和也

抑吾聞之爲國家者無逸獲無幸存而尤無捷法深思熟慮循序漸進人盡其職官不徇私或有冀也若欲設何策以杜敵謀爲一勞永逸之計是不啻挾泰山以超北海有是理乎吾國惟人懷此心故拳匪之說乘間而入今種種之法雖迥與邪說不同然其中於求逸徼幸之心則未始不同源也此等政策寧盡不可行顧但可濟一時若長久之謨實別有在孔子曰仁者先難而後獲吾願吾國志士畢心致力於此也見宣統三年六月初六日芻言報

### 論借外款之宜慎

吾國至今日財源窮涸國家舉事運掉不靈故吾於借外款一事不敢竟謂其不可雖然借外款之不可視爲之何如耳爲之而善則足濟一時之急爲之而不善則大勢隨以去矣然則吾國之廢興存亡皆懸於此當事之人可不益加慎重哉

茲錄本月初七日上海時事新報譯泰晤士報記波斯事一段於下以當炯鑒


波斯議院於六月十三號提議美國財政顧問官之職權既而全場議決其職務甚爲賅博所尤注意者則該院反對政黨亦一例贊成此議於是而

美人麥加歇斯德君一切變財政顧問官而為財政總監督矣該院訂定者凡十二款其第一款謂一切經濟及財政事宜該總監有直接管理之權而各頭錢糧之徵收或支用亦與焉第五款與以總司國庫之權凡政府費用必先請其畫押即有向人定購不須現錢者亦應先由該總監批准第六款謂財政部之一切章程總監有興革之實權第十二款許以統治僚屬之全權觀此可知麥加歇斯德君之品望已深印於波斯人之腦府而國會與以全權亦未為失計蓋如此則麥君得本其堅決果敢及廉正坦白之心以治既禁之絲而終達清理之目的若僅僅與以顧問官之位則麥君在美國時早已函謝斷不肯空勞往返耳記者曰吾讀此譯稿為之心驚為之膽戰願吾國政府吾國疆臣吾國國民引為殷鑒

以吾國財政之紊萬不可借款又萬不能不借款當大任者惟有破除情面綜核名實而凡百在位咸能廉儉勤苦求盡其職則國其庶幾乎見宣統三年六月十六日芻言報

論年

按南通張孝若所著張季直先生傳記第四章第五節內載張先生實業宣言有云當清光緒之季袁氏任北洋大臣時舉國喧騰借外債造鐵路之說袁令楊士琦南下以外債可借否諮詢湯君蟄先鄭君蘇堪及饒湯君絕對主張不借鄭君絕對主張借審則以風氣未開國人常識不足不盡知實業交通之利益有力者徘徊觀望無力而徒然者不足濟事故外債可借





但借時卽須爲還計用於生利可用於分利不可而用之何事用者何人用以何法尤不可不計此審夙所主張云云與先生所言固不謀而合也

駁剪髮易服之反對論

剪髮易服一事言之者十餘年而吾浙人以生計之所在起而求罷此議而九月初四日都中帝國日報獨著論深責之且注其下曰請看浙江商會之糊塗蟲請看浙江人之私利心余浙江人也則亦糊塗蟲也請以糊塗蟲之資格而論茲事可乎

夫人將飢寒就死而呼號跳擲此雖極殘忍之人不能阻使勿爲且不能謂爲不應蓋人之可哀孰有過於無端就死者乎孰有過於未死之前明知己之將死乎況此非一人一家之慘而數千萬人之慘也於是而罵爲糊塗斥爲私利誰能任之吾江浙固以蠶桑著食於此者非獨綢業中也舉凡養蠶者種桑者繅絲者織綢者販綢者若主若夥若粗工若船戶恃以爲食者不知若干萬人一朝令下易綢而呢則諸人無策惟有束手聽死而已

或者曰今之剪髮易服行之以漸則或稍紓也余曰固也然卽以漸而損失固已多矣且所慮者則人人懷全行更易之心則進貨之家節節遲疑而工商機關必大爲之滯況所謂行之以漸者必有所謂十足圓滿之日卽全國悉易服是也不知彼時已有術以生活此數千萬食於絲綢之人乎抑仍迫令自行設法乎若謂令改織呢羽則工藝家改變甚難且吾恐彼時人人好用外國之呢羽而不用本國之呢羽也若謂可設法銷諸他國則恐爲事旣難且數必極少況試辦之事安可指爲口實萬一失於此而不能得於彼則爲禍甚矣

假使剪髮易服之後而吾國立時富強一切損失之權利立時回復則謂當以數千萬人爲之殉猶可言也雖然猶恐其難也今則剪髮易服不過收剪髮易服之效而已不過舉動便捷不與人爲異而已外人對於此不過謂中國人能類我不使人怪詫而已於他何有哉

且今之論者非謂小民生計日迫益宜推廣實業乎然而言屯墾言工藝言殖民利未覩萬一也而於已有之業則不惜大破壞之吾不知論事者何不措意

至此也

剪髮易服一事吾未敢置一辭然剪髮易服其收效不出於前之所云而實禍則立有受之者不知當局何以處之見宣統二年十月初一日芻言報

讀議員論剪髮易服事簽注 摘錄

余此文無關於剪髮易服之本旨惟見諸議員所言往往率臆直道在彼已以爲四面周到而不知語意之舛誤聞見之偏狹有矢口言之而不自覺者茲舉各報所載約略簽注蓋欲諸君子有以進於是而他人亦得以知議員之所言未爲盡是而各思研究以求進步則余所深冀也（中略）

方議員謂易服一事須指定一種材料若將盡用外國呢料將來經濟上必生恐慌羅議員謂本案已明定用本國材料包括甚廣可以不必專指一種方議員又謂普通人衣服用布政界則用綢緞須明定之陳議員謂此事可以不慮常服不改而禮服制度未頒以前必仍用現在禮服汪議員謂如何服制未敘明應加入仿照新定軍服制度量爲變通

按如諸君之言周到詳密爲民間生活計者可謂至矣雖然吾恐機業之恐慌已不能免也以伊等不知究竟用袍褂否卽不敢織卽明告以若干年始改然買者不敢多買卽織者亦不敢多織且彼等對於有限期之生業正如刻日將入死途其索然之狀已極不堪且此輩恃數機爲產業卽告以舍舊謀新而彼烏能售舊機而製新器然此猶或可也惟新服短舊服長新服少舊服多出入之間奚啻十倍則凡蠶者絲者織者以機爲產業者販者肆以售者運者其生業咸十去其九已可慮矣若用呢絨則食於機者斷不能鳩巨資以開廠織綢者又不能去而織呢惶惶之象愈不可以終日矣見宣統二年十一月二十一日芻言報

論年按先生當時因有一部份人主張易服之故力以小民生計爲言聞者或不注意然觀于入民國後絲業織業綢莊衣肆之迭次呼籲力竭聲嘶至今未已則先生所言誠未可視爲無病而呻者矣

### 正名說

凡稱謂名詞之間有極大關係存焉沈子培方伯憎日報之不識內外之分也曰與其稱中國不如稱我國猶有內其國而外諸夏之意余聞其說大以爲然又新名詞百凡皆可通融惟吾國人自稱爲支那乃至無理此二字蓋外人亦據轉輾傳訛之字而書之者譬如蒙古等處稱十八省人爲漢人歐洲等處之人稱吾國人爲唐人若吾國人亦自稱爲漢爲唐可乎又如吾國前亦稱美爲花旗德爲茄門彼亦自稱爲花旗茄門可乎吾國舊籍向稱日本爲倭試問日本亦將自稱爲倭乎凡此若視爲新鮮而用之也見宣統二年十月十一日芻言報

近年廣譯日本書籍遇有日人所用名詞卽一律承用而新名詞流入文字者指不勝屈甚至公牘用之甚至詔旨亦用之而稍涉新學者尤滿口皆是至文明運動改良特別等字面閭巷婦豎亦動輒齒及論者大以爲病竊謂此須分別言之有向本無是名詞而不得不沿用之者有向來所定名詞不如彼之名詞而改用之者但求其精確可矣不必辨其爲彼爲此也且名詞一事日出不

窮漢唐以後必多於三代宋明以來又多於漢唐事理推拓日多豈能設法禁限卽六朝佛教大人慈悲善知識等語亦流行於中國初何足怪惟有一事雖極細微實足爲詬病則近來動稱中國爲支那是也天下之興不能自名而轉用他人之名或戎狄則有然耳外此則無不用己之名稱者況支那者亦非彼人特以名我實緣輾轉傳訛乃有此號而我轉以他人傳訛之稱而以自名準此言之則葡萄牙當自稱爲大西洋美利堅當自稱爲花旗矣

又近序史事者亦徇西人之說而目三代以前爲酋長時代其弊亦與此類見宣統三年四月二十六日芻言報

吾國古來自稱中國對於四夷言之也以今日論則不符矣顧相沿久未由改也日本人或謂爲自大之證而吾國人亦多以爲病吾以爲無庸也蓋名稱之源於古者或不免有所錯誤而承襲既久安能革之卽西人之各種名稱似此者多矣安能一一革之乎又如日本二字今日核之於理豈有當乎見宣統二年十月十一日芻言報



今人惑於外人之說則以爲吾國之黃帝自小亞細亞來吾國之人種皆由彼來也雖然吾竊有一疑焉夫黃帝以前世所傳帝皇之名謂之渺茫可也若伏羲神農前乎黃帝固不誣也既有帝必有人民得無謂黃帝勝神農之裔又逐蚩尤而吾國古代之民族咸被誅逐乎如是則既依外人之說承認黃帝爲西北來之人又必平空添出黃帝殺盡古漢族之一段血史而後其說可通吾不知若輩何樂而爲此按黃帝爲少典之後古書言之多矣雖不盡符而要不能謂之無因也今一概抹煞奇乎不奇見宣統二年十月二十六日芻言報

西人有以吾國種族爲來自波斯之帕米爾高原者雖亦自執一說而我國則從無此紀載乃近來喜其新穎遂亦附和其說謂黃帝實由北荒而來無論與西人所說年代不相符抑思黃帝神農諸帝典籍可證絕非荒渺無稽者可比今以西人之言而欲將黃帝以前之史一筆抹煞則謂羲農以後已與苗民同其竄逐乎抑彼時羲農餘裔已無存乎芟我前徽就彼孤證果何爲耶見未刻

稿

論年 按最近東方雜誌第三十四卷第七號載有兩文足與先生之說相發明茲爲移錄如次

李長傅撰中國文化起源與世界文化移動之研究有云主張中國文化之發生於本土者以夏德博士爲最早其言曰中國紀載決不言其族外來凡以巴比倫印度埃及和闐等文明古城爲民族之發源地者皆無根據又云據中國人紀載漢族自始卽居中國西北部故其來源吾人應以不討論爲是此爲外國學者主張中國人爲土著者英國洛斯博士 L. Ross 卽推廣其說而謂文化亦出自本土其言曰據周秦漢神話時代紀載中國人實爲土著其文化孕育於本土彼等學說皆根據中國紀載其斷論太籠統茲當就考古發掘等資料中求之(中略)

據此則北中國新石器時代之居民確爲今日漢族之祖先在當時已有相當之文化但此文化亦不過應其物質的生活之發展階段必然的發出其階段之文化雖不免受其他文化之影響決不能抽象的將其若干遺物中

僅擇彩繪土器而附會其文化甚至民族由他國移動而來(下略)

林惠祥中國文化之起源及發達有云法人羅蘇彌 J. Rossignol 英人洛斯

L. Ross 皆言中國民族即發生於本地羅素 Russel 韋爾斯 H. C. Wells 亦言中國文化係獨立發展者(下略)

觀於上列兩文則先生力斥吾國人種自小亞細亞來及自波斯之帕米爾高原來之說誠不爲無見矣

詒年按最近東方雜誌(第二十三卷第十六號)載有貝琪君所撰章太炎

先生之史學一篇其第五章述章先生之言曰日本開化在隋唐間至今日觀隣近之國開化甚早未免自慚形穢於是造作譏言謂堯舜禹爲中國人僞造其淆惑聽聞尙無足怪獨怪神明之後史籍昭彰反棄置不信自甘與開化落後之異族同儕迷其本來數典忘祖不亦大可哀乎云云與先生所言若合符節矣

日之有晝夜歲之有春冬人之有生死國之有興亡其相類者乎顧有大不類者日之何時而暮歲之何時而冬此有定者也故達暮則爲入息之謀經冬則爲改歲之計若夫人雖必死而生命可以延長故人生一日必宜爲不死之事不得妄謂已將死而事事皆不向前也至於國則國中上下能竭力扶持直可以不亡故凡國家存在一日人人皆應爲存國計不能預爲亡國之計此固甚顯之理也而今人動言厭世動言欲覓桃源何也見宣統二年十月十一日芻言報

逮暮而飢人欲延之食曰稍頃將晚餐矣稍忍可也是則以晚餐有定時也可言也老人衣破不復作曰恐卽死無用此也此則可笑矣以人死無定期雖遲至十年可也雖然人者必死者也是猶可言也今使衆人議舉一事則不欲曰恐吾國將亡徒費心力此則可笑極矣以國者不必亡者也奈何國中之人乃預算以爲必亡此不令他國之人大怪笑乎然而吾國縉紳者流動曰國事不可爲吾將覓桃源避禍又曰將脫離政界而以治實業爲職志此不可異乎或

笑謂余曰此猶高等人之言也此猶表面之言也其人人心中一語則曰趁火打劫而已噫

或問余曰今日言厭世者何如余曰譬如人家失火子弟大者持桶小者持瓶將以救火忽一人擲所持而逍遙於外曰火難治吾將入厭世派此亦可乎見未刻稿

近來吾國有新發生之危機不可不察也一則學堂之學生不受管束也一則兵隊之兵動輒違犯也而苟其滋事亦但遷就了事未有執法以治之者而美其名曰和平了結見之報章者已指不勝屈其不見報者無論矣吾聞兵隊中人曰軍人偶有例外之要求將領輒枉曲從之如此尙保全面子否則彼等直自行其意將領亦無如何也

學生宜服從凡閱書報宜聽校長之准許學生不得集會此各國普通之規則也而我國竟不能且報章又從而鼓吹之軍隊宜服從尤過於學堂而報章之論時復違反然則報章者鼓吹禍亂之法螺也見宣統二年十二月初一日芻

言報

詒年 按張季直先生傳記第三章第二節內載張先生所撰論嚴格教育旨趣書亦力主軍隊無放任學校無放任之說其文如下

軍隊無放任學校無放任此今日世界各國之通例軍隊放任則將不能以令學校放任則師不能以教將不能令則軍敗師不能教則學校敗其爲國患莫此之尤（中略）近者政體改革趨向共和而一班事理不明之學生乃有誤解共和以爲放任等秩序於弁髦病嚴師爲專制者竊竊私議鄙人頗有所聞不知歐美養成共和國民惟以重公德愛秩序爲唯一之方法若妨公德而害秩序則謂之破壞共和（中略）凡教之道以嚴爲軌凡學之道以靜爲軌有害羣者去之無姑息焉鄙人誠重教育誠愛學生心所謂危爲此通告

觀張季直先生所言如此則先生之以學生不受管束軍人動輒違犯爲新發生之危機固非過言矣



近來言男女平權矣結婚自由矣發之者徒見外人之說新奇可喜從而宣暢其說而於風俗習慣之可否移換利害禍福之關繫如何未之審也卽於西國風俗之實際其男女所受之影響亦未察也但取己則快然言之人則快然聽之而已顧吾有所疑者今日自公使以至學生與外人結婚者往往室有糟糠置諸不問妻家勢力懸絕莫起與抗卽在內地者亦多如是而所謂持公道主新說者亦緘默不言豈略通新學之男子卽當享自由之幸福而窮居家中之婦人并不得受平等之舊例歟或曰是別有故焉一則有勢力者也一則無勢力者也一則有交誼者也一則無交誼者也嗚呼所謂公道者存乎勢力與交誼乎見宣統三年七月初一日芻言報

論年按先生作此語時爲宣統三年至今才二十六年耳而結婚自由離婚自由已成風俗爲利爲害殆難言之顧就論年觀之則但覺其利于男子者多利于女子者少也夫婦之結合動以資財勢位容色爲互相歆慕之條件一旦色衰勢去又棄之如遺矣夫婦道苦于今爲烈先生有知不審將作何

感慨也

近來有志之士多有投江海而死亦有激成癡癩輾轉至於死者其中原因亦非一致或激於所遇或不遂所志或求學太過或任過其量初時冒險而莫爲之繼甚至見負於人或輕於相信而爲人所給又或危慮太甚或求名太急種種激薄皆足致此雖然爲志士言則保國之外尤宜保身而保身要在養心須中有主持更求肆應否則爲外物所動至無以自存其身未至成仁之際先自戕賊其身亦可惜之甚矣見未刻稿

論年按時至今日自殺之事乃愈多或以投機失敗而自盡或以情場失戀而自盡較諸先生所言幾于愈趨愈下矣

變法時代要須有開創氣象則凡文字詩歌樂曲皆當以此爲標準而今乃不然專好爲國家點綴作衰亡氣象尤異者好刊亡明詩文及記事之書事跡則散渙頽敗詩文則悲愴悽惻於今日最爲不宜尤可異者乃表章及錢謙益錢進退失據爲顧亭林所深斥此等人豈尙有足師法之處縱謂其詩文佳然有

文無行益可醜鄙近來風教衰息氣節不振崇獎剛正猶懼不及乃爲此等敗類鐫刻遺集亦何爲歟見宣統三年四月二十六日芻言報

前者以種族之故而思明以思明之故而推崇明末之人物於是大搜羅明末人之遺籍而刊布之此已爲無聊之舉動矣顧猶得曰搜刻書籍表章人物亦風雅事也顧近忽大刻錢牧齋之書則更奇矣夫錢以失節喪志之人卽有文采何足表章尤近者如明之李贄以倡狂妄謬著而或且揚其餘燄又如金聖歎其人逞其小慧致蹈法網其談文論史實爲邪魔外道乃今忽有徧搜所評之文而刊之者竊恐後學不之辨將習非成是則吾國文字且受其禍矣見宣統二年十二月二十六日芻言報

論年

接近數年來輯印亡明詩文之不已又競搜彼時所謂小品文字爭相刊刻閱之足使人志氣銷沈精神頹喪而戲館電臺則又專事傳播靡靡之音尤於世道人心大有影響使先生在今日不知作何感想也

近來百忙中忽有所謂佛教研究會者出現吾甚惑焉今日吾國之人猶有談

空說有之工夫歟佛教閱大吾知之矣然果適宜於吾國今日社會之用歟或曰佛教仍以救世爲心非離世獨立者也吾輩研究之將爲救世地也噫是則欲救涸轍之鮒而求水於東海之說也且倡是會者果猶能靜其心凝其思看一卷佛經歟其於佛之學說果貫串而有心得歟其終身行事果依佛說無違反歟至列名之人大半治實業者否則亦各有所事吾意以彼之才力之精神僅治彼之事已不足矣又能分其才力精神以研究佛說歟如其然也是自誤以誤人也如不然也是姑爲此以相蒙也二者其何居焉見宣統二年十月二十六日芻言報


近來各說紛騰之中忽然佛說亦屢入其間此事甚可怪當此危機極盛之時方宜各出心力堅毅從事豈有反而崇尚寂滅之理顧持此等論者亦有數端或體質高明不屑世事或性情孤冷棲心淨土亦有憤激之過反成空寂適會不辰遁入虛无此固各適其適無可論列者也至若心無所主而以此飾其陋身無所歸而借此爲談柄抑亦次矣若夫口口口口口口恐但持常說不足張其軍

乃假高明之說以張其牢籠萬有之勢使人望之彌高且使其黨持此爲論常言口口口口冤親平等亦足使對待之人淡其猛進之心殺其相敵之意此則藏機甚固非常人所能窺測矣見未刻稿

人制器物我擇而用之與我無器物但仰給於人二者相去不可以道里計不知第二之禍卽第一所釀始則用人之器而不知精己之器繼則不顧己之物而用人之物已而已雖有適用之物亦不用而專用他人之物其卒也則己之物以無人過問一切廢絕雖欲不用人之物而不可然固不能用上等之物也大率以吾國上等之人用他國下等之物以自傲其儕至中下等人乃用土制極粗極陋之物雖欲不自命爲野蠻而不能噫見未刻稿

初弛海禁吾國先輩惟謂外人以奇技淫巧易我金錢以去豈知嗣後乃以布帛粟菽易我金錢而賒我乃愈甚又先時但以彼製造之物售之我今則仿造我之物而售之我初時由彼國製造而運至我國繼則就我國設廠製造而就近售之我務使彼之物無一不合我之用我國需要之物彼無一不備且使彼

仿造之物無一不賤於我所自製必使我國手工所製不能復易一錢嗚呼外人之待我真愈逼愈緊而我國無權藉者無可爲計有權藉者亦不知爲計吾不知死所矣見未刻稿





書牘輯存目錄

卷上

上政府說帖

附要事雜陳

上某疆臣說帖

卷中

上浙撫廖穀似中丞書

四通

致吳佩慈先生書

上直督王夔石制軍

鄂督張孝達制軍書

致王苑生

孫慕韓


夏穗卿三君書

致朱亮生先生書

致歐陽雲衢先生書

致蘇松太道蔡和甫觀察書

上晉撫胡聘之中丞書



上江蘇學政瞿侍郎書

上江督劉峴莊制軍書

致蘇松太道余晉珊觀察書

上江督劉峴莊制軍 鄂督張孝達制軍 粵督陶子方制軍書 一一通

致陳雨蒼京兆書

再致陳雨蒼京兆書

卷下

上瞿中堂書


致張劭熙 朱桂辛二君書

致朱桂辛先生書

致張劭熙 朱桂辛二君書

上呂鏡宇尙書書

上鐵寶臣尙書書



致志仲魯先生書

致劉幼丹觀察書

致高□□先生書

致蘇松太道袁海觀觀察書

致唐傑臣先生書


致吳授卿先生書

致藤田劍峰先生書

再致藤田劍峰先生書

致唐□□□□兩君書

致□□□□君書



汪穰卿先生遺文 書牘輯存上

弟汪詒年纂輯

上政府說帖

按此說帖當是作于光緒二十八年或二十九年

一近日局勢愈迫之狀

一各國規占愈甚如俄陽言歸東三省而規占益急英俄均染指西藏俄又誘我蒙古法始得雲南礦路權繼又與桂撫有約將插手廣西近英德於長江事頗致斷斷英意有管我粵東三江叉口之謠如是則數年以後竟不知是何景象矣

一各國竟迫易我疆臣如法人不許錫爲豫撫而卽調之熱河不許丁爲西撫而卽調督雲貴在外人實無理已甚而我所以應付之者亦失之綿軟

一各國均於所指勢力圈各地誘人學其語言如日本於福建浙江多設日文學堂俄於東三省直隸廣誘人學俄語已明露佈置瓜分之意

一各國於對我政策多易強橫爲柔軟而以承順宮廷意旨爲上策如各國

使臣於內廷燕會極爲聯絡甚至有助修頤和園之說一若受我籠絡也者  
今又有助萬壽經費之說俄設道勝銀行專與我貴人結聯且及大璫如白  
雲觀道士亦不惜傾意結之法則令樊國樑等在京城交結貴人其用心深  
險實令人悸畏

一商務愈見敗壞去年因北方大亂初平上海商業頗見生色今年則如天  
津之現銀奇絀營口之貨物滯銷無論矣上海號最繁盛近亦黯淡無色他  
如川土以加捐之多倒塌多家而各大鎮倒去之行號亦不少此皆因賠款  
過鉅大傷民力之故今第一年已如此再過數年何以爲繼

一賠款一事各省分攤甚巨如川省地大物博尙不覺大累餘如邊小之省  
不能支給固矣乃至財富如廣東亦復窘態畢露自餘各省支絀可想聞竟  
有無可籌措惟藉借洋債爲搪塞者竊恐不數年後我國百孔千瘡難再敷  
衍勢必如市面之虧倒大局如此何堪設想

一各省民益困窮遂至逼爲盜賊而廣東廣西四川爲尤甚此等盜賊不足

成事而剿淨甚難蔓延則易且恐良民被擾商農各業均因此阻攔則窮民益多窮民多則愈易流為盜賊且租稅不給則賠款無着勢必別籌徵收之法愈益逼民為盜竊恐不數年後所在騷然而外人即藉口直行瓜分之事一近來少年多為平權自由之說所亂而東南諸省尤甚實緣見國家並不籌安定政策全國人民如坐漏舟動即傾覆又為東西洋之說所亂致激成此派此如熱極生風風又生熱此等談論致亂則易定亂則難若使再三五年必至人人皆操此等議論而大亂將從此起

一近日尙有可乘之機案今日內外大臣皆相率袖手者其意蓋謂時已衰弊至極變法亦亡不變法亦不過亡而已也殊不知我國根柢深厚遠非他國所及若果上下竭力振作斷無不能挽回之理謹將各條列下

一人心尙未離散中國之病在上下相蒙而暴政苛法究尙不多故今日人心雖未日見團結亦並不散渙且以恨外人之故而思治之心益切無有因賠款而生怨叛攜貳之心者近來雖有惑於革命之說者大約不過全國人民十萬分之一斷不足慮人心可用如此若不亟乘實為可惜



一尙無陰主外國之黨派查黨派之事雖效驗不一然一有主外國之黨派則其國必亡中國在下之政黨未成其在上者雖意見宗旨不一然若明爲主某國某國之黨派則尙未有此亦足爲易治之機惟若再遲數年朝廷用人之權柄益爲外人所持則大臣之賢者必相率引去其不肖者必隱恃一大國以爲奧援彼時必實有主英主俄名目則更不可爲矣

一留學生均能不爲外人所移查我國出外之留學生雖有和平激烈之不同然大率因感於世變忱於危亡故無論宗旨如何無不冀吾國之振興免外人之侵侮斷無有媚外人以求富貴者且彼此互相稽察亦無一人敢背衆人以行私計者將來卒業即可收爲國家之用此亦事之可喜者也

一近日入耶穌教之中國人因歐洲各國每因教案多所要素中國既因此失地失權而教中亦受惡名故現在集議擬辦華人傳教之法如果能辦到則民教之事從此易於措手可以全力釐正法度整飭吏治

一寓南洋之工商人等無慮千萬殷富者極多近因受外人之壓制思中國

之念愈切若招使回國辦理經商開墾等事必易奏效惟必須孚以真誠行以實政而又有良法經緯之並無使姦人因以爲利庶克有成

一民財猶可支持查中國自開海禁以來兵禍教案之賠款幾及數萬萬商務之短絀又數萬萬庚子拳禍官私喪耗亦數萬萬無論何國當之必久不支我國現雖虛耗然民力猶未盡竭東南之民擅商利者西北之民富蓋藏者猶不可勝數祇以國家保護無方誠信不堅商律不設商利不振故民財不出民財不出則市面愈形倒壞此事急宜爲法以維持之而民財之富厚則固有足恃者

一民情之強悍東南濱海之區西北沿邊之地其人大率強悍性成殊死不顧且極知外權侵入之可恨又知服從外人之可恥故雖爲外人奴役之人其心均不爲外人所用甚至因教案等事被誅者已肩背相望而近處之民猶不改其故態民氣之可用如此若上之人有以率之則鼓盪奮興有可預決者

一地寶猶未盡洩中國礦產甲於五洲且二千年來未大開採今雖爲外人索去不少然所留存猶不可數計惟須國家善爲維持勿多設苛例勿先令報効則將來開有成效民間之富卽國家之富此可預決也

一近來措置失宜之事

案我國失業之事通商以來不知凡幾然當此舉國渴

慎卽多關礙  
舉數大端如下

一宮庭用度糜費使人心懷疑恨近以賠款捐稅驟增朝廷力崇節儉猶懼民怨沸騰乃今則各種建造旣任令中飽若夫頤和園之修復及一切玩好之用又特建至頤和園之鐵路已顯背前此臥薪嘗膽之諭旨能不使人心離散乎

一著名貪劣之督撫監司均聽其固位如閩浙總督許應騫新任廣西藩司湯聘珍皆劣名久著而寵用如故何以懲不職

一用人失當如王之春之凡猥而使用兵廣西德壽之庸鶩而使督兩廣恩壽之下劣而使撫江蘇人位太不相稱何由責效績乎

一調動之可異如張香帥調署兩江以大局及資格言之謂必得實任乃忽調魏午帥督兩江而張仍還督湖廣或謂由袁制軍之查奏或謂由湘員之營幹皆姑勿問惟以如此大員而忽彼忽此有如奕棋且張雖不盡善在諸疆臣中尙爲盡心國家者今若此豈非失重臣之心

一權利之失如電局借大北公司電線和議既成但當於還綫時酌擬酬報乃忽許特設由津至恰克圖綫借與外人發電如此大權忽去之不顧豈不可怪又如路礦之事凡有外人出名者或聲明借洋款往往得批准而華人則以不能驗費不能報効之故輒不得允許坐視大利流出外洋豈不可歎

一大失商情近來日言保商日言開拓商務而使商人短氣之事仍屬不少

開平礦局之歸外人無論矣如電報局商辦著有成效乃忽欲歸官

案此事但可言

奪或權以歸公舉而不可言經歸官也使商人皆疑國家並無保護商人之意又如江蘇大府

於承辦蘇經蘇綸二廠之祝某平時則處處牽掣應付之款不遵合同及祝事敗乃按事苛求不少假借致祝徧函中外呼冤不已豈不令商人寒心

案如上所言則國勢之可危如此而機會之可乘者又如彼則如欲挽回國勢惟有內外大臣合用全力大加改革必有濟如但偏舉一二事則不特於大局無裨卽此一二事亦歸無用而已茲約舉綱要如下

一近日極宜辦理之事

一定政本 改革之事約數大端一軍機以一人總諸務擔任全國之責任  
二各官皆有實事三收各省之權於京師四凡諸大政皆由京師分條以布於各省勿使各省各自爲政

一定切實辦法 凡變法之事入手辦法有二要一從大處佈置如上條所云是也一從切近處入手則嚴定各署辦事程限嚴定辦事時刻令京師干謁燕會之事日以減少凡事皆以勤實平直爲之力反從前雍容延緩之習如此則官場習氣一變功效之見有不期然而然者

一速定外交政策 凡地球上諸國必有暗中聯盟之國庶平時旣隱有所恃有事亦可相助如聞京中頗爲俄人所煽若隱倚爲長城不知俄人外交

政策至爲叵測宜別求與俄爭權之國與之厚結深交以定國勢如此時不定則以後中國必成角逐之場矣

一速聚人才於京師近日中國黯淡極矣而京師爲尤甚欲提醒精神振作氣象惟以旁求天下人才聚之京師其著名吏才則超升之儲爲異日監司督撫之選如此則可使外人頓改視聽

今日人才別紙詳之

一別籌賠款之法庚子之事起於北省而賠款之禍則各省人民共之能無怨望聞熱河有積存金銀無算而內廷所藏亦復不貲竊謂宜由國家銀行發出國債票即將積存之款盡行發出購票既可平億兆之心鼓全國之氣且民間亦可因此稍舒喘息即盡力以營農工商諸業而內廷亦可得利息以資用度一舉而三善備實無過於此

要事雜陳

按此篇原稿列于上政府說帖之後當是同時所撰呈

### 一扶助華人自行傳教

上海華人之入耶穌教會者因見近日辰州教案大失國權並以一二教士



之故至使官長被戮實懷慚憤且有礙教會聲名爰集衆會議華教士自行傳教之法此實弭平教案免避外釁之一大機會日本所爲無教案者亦以由本國人自行傳教受一王之制馭不使外人得干涉也竊謂我政府宜乘斯機會急起圖之宜敏速宜慎密宜宛轉庶得收捷效聞去年李提摩太入京所陳教務頗平易可行而外務部以恐天主教不同嘿然無言坐失事機莫過於此惟此事教會與政府太不聯絡必須有人交通其間方可有成茲擬辦法如左

一政府速行密議如果允行卽請諭知

二俟得諭後卽當與該會人商量將來辦法並令與西教士商妥得有切實憑據卽令其公舉數人至北京外務部呈請

三外務部得呈後卽召天主教神父告以耶穌教已定華人自行傳教之法將來彼教必將盛行如天主教能與同辦庶不落後

四如天主教亦肯就範圍則以後西教均係華人自傳固甚美卽不能則但

行之耶穌教亦大有益且可使天主教人以漸改移


五既定華人傳教之例卽行頒諭中外

六國家對待耶穌教之法仍須與前無異一督撫及地方官仍須切實保護  
二不得妄相誣詆三不得因改例而有欺凌強壓及報復之事

再此事關繫極重而天主教一面尤須著意如必欲辦似宜求精通法國語  
之人辦理方妥

### 一處置赫德

赫德一平常英國人而我國稅權郵權均在其掌握甚爲可驚此事關繫百  
倍電報而政府未措意及此不可解也聞赫德初得稅司時意猶未甚奢曾  
移請總署招華人習關稅事而總署謂使華人辦必無效竟卻之赫覘諸大  
臣之昏瞶遂肆行盤踞之策凡稅司所用華人其薪水較洋人優絀殊絕而  
加增薪俸時往往華人獨不得加於是稅務郵政悉入其掌握此大可恨也  
竊謂朝廷如果欲收回此權宜因彼請退時因而許之且不妨予以虛榮其



現爲副稅務司之裴式楷赫必請爲己代朝廷亦宜權許之而另設一名目或總辦或監察之類使戴樂爾賀璧理居之令權與裴相等朝廷陰倚重之使擬稅司各官遷轉及使華人以漸升稅司之制稍久則假一虛名調裴他去而使賀戴爲總稅司賀戴特見擢用必心感國家其效力必甚周因賀戴二人此次襄辦商約頗盡忠策多與赫異議惜或不盡用之又開議之始二人密陳於盛謂商務中事華人受虧已久宜乘議約之時設法挽回盛令開呈而終置不議甚可恨也

### 一整飭稅務

進口之稅由約章議定不能增減已爲失權之極乃洋貨價值屢增而我稅關所據仍十餘年前之舊價鎊價屢加而我稅關每鎊仍作四兩國家受損奚止千億今秋始將前數年所定酌中估值之法頒行其估價已嫌太廉而赫以法人之阻遽移文各關令銷路少之物仍照新頒之例至銷路多之物則依舊例此事欺我國太甚宜選大員擇著各商家將所估價重行查過如

有不實再責令更改不能因外人不滿意而遷就又稅司專意苛虐華人華  
人不上稅則之件亦任意攜去此事實宜禁斷

### 一處置盛氏

盛氏乘我國未立商部未定商律舉朝大臣不識商法之時乘時巧竊規占  
諸權以爲已有所攬利權可謂極亘古全球所未有自鐵廠電報輪船鐵路  
絲廠紗廠鐵礦煤礦皆足籠全國之大利且陸行則鐵路水運則輪船通信  
則有電報及德律風教育則有天津大學堂及南洋公學則不特財政卽他  
種權亦均在其掌握所惜彼惟有巧猾之才足以創事而不足以成事所用  
之人大半宵小因緣爲姦其家中上下皆崇尚淫侈故稍有知識者皆識其  
必敗惟挾權旣多若一時倒敗必致貽累大局且恐將所辦之事暗中抵押  
與外人宜將所辦之事以次清釐定一商辦官查之法此須查各令彼不得  
擅行調撥又輪電兩局積弊叢生如尋常電報分局動輒每年數千或至萬  
金而輪船買辦大率輸巨金於盛氏乃得之

一處置電報之法

所惡於盛氏之辦電報局者恨其以大衆之利益供一己之揮霍暗中調撥  
股東不能過問是有商辦之名無商辦之實所謂挾商以朦官挾官以凌商  
而非恨其爲商辦也若恨其爲商辦則從前何故許之辦理數十年而忽奪  
以歸官此非謂爭權直是奪利耳如此則盛氏轉有辭以對政府且可以此  
激動衆心且從實估價值國必無此財力如低估則商情尤不服又歸官之後  
必不能盡善一更易漏洩二官常易人必致時有更變竊謂與其改官辦而  
國家仍不得利中飽而巳不如正名爲商辦但不得歸盛氏一人主持或管  
轄之權歸國家而利權歸商人凡收電費管帳修理均歸商人惟每局委員歸國家亦尙穩妥竊謂此  
事宜廣查各國辦法參酌用之方能有利無弊近日查辦電報之論關繫大  
局實非淺鮮故數日之間股價忽已驟落竊謂果欲歸官亦宜明下一論照  
前下諭旨日股票時值發售則商人亦尙可平心否則竊恐西人乘便購取  
賤值之票逮歸官時逕聲明已歸西人則商人失利國家失權良爲可慮招


商尤非電報可比決不可歸官如改正商辦之法則善矣

一應防備之人

近日電局既奉諭旨不日歸官招商一局亦岌岌可危然竊謂朝廷於此極宜慎重果能舉盛氏把持諸事一一得人而理豈不甚善所可慮者或非出朝廷本心別有覬覦之人媒孽以得之或數人合謀以成之則此諸種利益不歸之盛氏仍歸之他人且盛氏不過志利而已他人則恐意別有在將假此利源以供叵測之用實宜預防

一慎重諸權

近人皆謂我國政多牽掣不知各國之政亦無不牽掣者故用兵者不能理餉竊謂兵事當總於兵部專主調發而兵部大臣不親自帶兵其餘諸將則分帶各軍不能盡統於一人電局宜歸郵部輪船卽歸官亦宜歸商部鐵路應另有人主之而統於郵部近日袁制軍駸駸有總握兵權之勢且海軍亦似歸其統率權實已重如再將輪電之局歸彼節制則可慮甚矣





一鑄金幣

商務握全國人生命之源較之軍事尤爲緊要錢幣又握商務中生命之源萬一不慎則舉國生業失敗商局口亂最宜慎重竊謂我國本來並無幣制銀幣既未鑄銅幣亦不一律今忽欲越級鑄金幣必不能行康年以此事極要卽徧詢通達商務之人咸謂今日中國鑄金幣必不能行商約隨員溫君宗堯曰我國竭力鑄成金幣不足供一二月賠款萬一用盡勢不能復用銀幣此立窮之道不如改定銀銅二幣之制而設法使印度仍用銀幣英人工部局總辦濮蘭德亦曰中國現時必不能用金幣如用金幣國必亂不如定銀幣之制而與西國定銀錢換金鎊之定價並許照時價略高如時價每鎊作十三四枚以後不得增減如此則商業中風浪平靜彼此有益前鐵廠監督徐君慶沅曰中國宜乘用銀之時整頓商務如果金礦大旺則以生金售與外人與鑄金幣無異也茲總探諸說列之如下

一用銀之利（一）中國本多銀民間亦皆藏銀用銀最合民情（二）用銀則

出口貨至各國以價賤而易售

如值銀四兩之物從前運至外洋必一近日

商務之尙能支持者全恃乎此可乘此整頓出口貨物且可因此以傾各國

商務(三)用銀則進口貨物以價貴而難售

如外國值一鎊之物從前售以四兩者今必須售八兩之類

今日好用洋貨而尙未全用者尙賴有此可乘此仿造外洋之貨以銷行中

國

一用金幣之害(一)中國素少藏金又金礦利未大開(二)金既無多必購

之外洋金價必大貴(三)勉強鑄成若干金幣不足供數月之用以後欲續

鑄則不能欲仍用銀幣則不可必致立窮(四)民間藏銀之家皆成無用所

有中外之富家皆立成窮人(五)日用之物陡然大貴小民艱於衣食(六)

萬一西人不肯行用則不得用銀之利而專受其害(七)如西人因更換金

幣受虧而索償於我如近日某銀行於暹羅者則我國受虧不細按以上二

辨

或曰歐洲各國商務所爲受商務之虧者以銀幣太輕之過也如英金一鎊

易二十先令不過墨銀五六圓之重如日本則改正之其金錢重如一鎊而易銀錢十圓之多故可與各國頗頗而商務亦不受虧我國如鑄金錢宜師其法或加至十二圓一鎊且當定為金銀兩本位之制凡各國雖有銀幣然不許多用銀如英國交易凡二十先令以上即須用金鎊此謂金本位如既許用金幣而銀幣復不與限制者謂之金銀兩本位如此則我國金幣既少可國內仍用銀幣與外人交易始用金幣庶不致大受其害按此法雖名金銀兩本位實仍與銀本位無異雖不致大害而前列第二三兩條之害則仍無異則何必貪鑄金錢之名也如必欲鑄金幣尚以此法為善猶必須多聚藏金或俟礦金大旺始可為之

一速招華商行駛內河輪船

中日條約許外人內河行輪此為失權最甚之事今商約於此條又經切實聲明如果內河全行外國之船於大局所關不小蓋船既係外人之船則處處皆外人佔先著外人佔便宜收稅之官必須洋人報關行必須洋人所開關係甚巨宜速飭令外省督撫設法令各處商人妥速辦理小輪務須趕在

外人之先而長江上游尤要洞庭湖鄱陽湖及廣東西江亦應設法擴充庶可稍減外權之侵入

一 招華商辦理國內商務

各省礦務各處墾荒各城鎮修築馬路辦自來水電燈汽燈德律風鐵路添設支路皆亟待海外殷實商人爲之海外商人亦無不願之理而相率裹足不前者一諸事生疏二人地不習三國家之保護不力四官吏之侵抑堪虞孰肯以金錢付之虛擲哉且近來於此等大商業往往有走聲勢之徒代向當事者說合並許當事者之私人以重賄其費皆出之商人而若輩之酬謝猶不在內商人固已重費矣及至與官訂約以後則地方官吏又種種留難甚至棄前約不顧至當事者易人則廢去前約竟十事而九是以受累者切齒聞風者裹足況近來關涉商務之舉動無不使商人引爲鑒戒如開平煤局由張燕謀私交與外人如蘇經蘇綸兩廠硬將賠累三十餘萬之祝某看管如電報局忽歸商辦

校者按似應作官辦

於商務均極有關繫今若果欲招華商承

辦各事則須俟商部立定商律訂定國家實能切實保護一面密遣熟悉海外華商之人前往察看擇其殷實有國家思想者勸令回國辦理一切如猶慮上下壅隔則莫如設一保商局由商人公舉有名望人爲之專以通上下之情爲事如有官吏婪取非分之財者准由保商局逕稟知商部咨請該省大府嚴行究辦果能如此則僑居海外之商未有不踴躍內渡者

一 招求海外人才

政府以國內人才消乏且專門之學因向來風氣未開遂無學成之人因思華人流寓南洋及各埠者無慮百萬其中人才必多將招使歸國共效馳驅此自今日要務惟海外人才散處各埠或有才而未必著名若明降諭旨恐被舉者皆平常有場面之人其有才者轉致沉沒竊謂宜假他事派一深細公正之人前往察看俟考校得實方飭令領事保舉如此庶得實用

一 宜慎用外人

近來風氣凡大員遇繁難之事輒喜延外人爲之又凡見一外人輒妄謂其

才必無所不能竟有尋常一工役一無學問教士而頓請為教習或局廠總辦者糜款廢事且貽笑外人宜飭令大員慎於選擇嚴訂合同分別權限其薪水及激勸之法宜略仿外國體制其華人中有才與相埒者待之宜與外人相等不可使稍遜如此庶外人受雇者不得驕倨把持而華人亦有所激勸矣

一宜防外人侵佔內地商務

海口及出外商務既久為外人把持漸且侵入內地近已公然為之而日人尤為可慮從前往往有姦人假托借洋款合辦礦務其實資本全出洋人利權亦全歸洋人惟此出名及諸經手華人略得酬謝而已凡借款辦理而合與華事皆由洋人主持如有齟齬與華人無涉者皆此類也今則漸有行之自來水電燈自來火各種大商業之勢此等一種事業即奪千萬華人之衣食其事至可寒心惟在當事者力為拒駁而已

一慎重商約



英約一定中國受虧不小其實商約與和約不同斷無坐聽外人割剝之理而當事不甚肯駁辨或駁辨不得法幸馬凱向在印度本是商人於外交手段不甚在行於中國情形不甚透達嘗有訂成一事在馬凱以爲大獲權利者而寓申英商咸痛詆之以爲從前外人所得權利尙不止此故馬凱在申頗不得意今日本則大異是所派專使日置益君於中國情形雖不甚熟而小田切則在滬多年於中國商業情形及官場習氣無不洞若觀火且以從前辦事屢失體面今將乘此建立勳績以塞衆口其要素各款皆最深切我商約大臣盛則多私呂欠諳達隨員中楊文駿好挑駁小節以示能而於大端則漠然惟處處獻小殷勤取悅商約大臣而已餘更碌碌靜候優保溫某最明達而以官微所言不甚採納今旣歸伍欽使辦理伍素負重名旣諳交涉律法於商情亦熟自當遠勝盛呂惟伍於內地情形又不甚熟是在有以據正之者

一用人宜慎

時事多艱朝廷用人必時有不次超擢之舉然虛聲純盜及貌似有才者必首蒙異數而洋務人才爲尤甚以貴人不在行不若平常吏治之易被考察也又無可憑驗不若工藝之可以試驗也然此輩人特爲姦猾營私冒功不識大體而大局利害更復懵如如出使之梁誠吳德章在北京之沈敦和浙江之許貞幹貴州之劉貽汾皆是然以今日外交乏人此等人方在舉用之列將來貽誤國家必是此輩實宜慎之

上某疆臣說帖

按此說帖當是作于光緒二十七年辛丑以後

現我國政府既無預算改革之政策又無各省一律之辦法而大局危險日甚一日各疆臣等豈可坐享天祿漠不措意又豈可僅敷衍一二爲苟且塞責之地惟是處今日地位佈置既苦迫促舉動亦多牽掣實有萬分爲難之象然知其難斯易者至矣凡各疆臣豈可以難而置之歟茲謹具說帖如左以備芻蕘之採乞垂聽焉

一宜知今日所處境界之難

一諸事之掣肘今變政之事既無畫一之規條而朝廷所定權宜之制又飭令各省凜遵違之既顯背詔旨從之實未合機宜至財政一端尤爲賠款所阻礙因分攤賠款現銀不得不從重征稅實阻工商發達之機而出省之貨物爲他省釐稅所困亦滯銷路推之有保甲汛弁而巡警難實施有綠營而練軍爲重複餘事如此者尙不勝枚舉

一宜防中途改換外省督撫更變無恆一經卸任則在任時所布置倏忽化爲烟雲此最可慮

一須防他人之疑忌現在北京及各省皆以束手待斃爲得計自無所用其疑忌然各省苟有勵精圖治之人徵聘稍多舉動稍專則政府卽未覺察亦必有人發露倘有參差則前功盡棄此當預爲計及者也

一須防外人之疑忌現在外人已視中國爲几上之肉苟有奮發有爲者最觸外人之忌必將遇事勅去然後快意故外省於外交一途最爲緊要宜平日勤加聯絡且須有權術駕馭之

一整頓大綱

一首應按照各省地位將應佈置應改革之事及以漸進步之法開成一預算表以後即按節次辦事不得凌亂漏略

一應仍從前之形式而暗將政體更變全省公事均由派辦處主持外交則歸洋務局財政則屬之善後局兵政則設營務處而專任之巡警則屬之保甲局工商及農務則設農工商局而專任之他事莫不如此至文武實任之官其大者咸署名各局予以虛名而奪其實權其餘則姑置之務使全省之事皆一律一線如此則事事順手矣

一每項政事均置一局每局必派一總辦如本省適無名位相當之人則可遴選一明白道員爲總辦而另聘一專門之人爲提調或坐辦所有局中事宜皆由此人主持而總辦受其成如其人實有不合之處亦可由總辦稟商撤換

一廣搜人才本省人才必苦不足於用自宜竭力搜羅有用之才以襄治理

現今人才雖極寡乏然極意搜求亦足一二省之用惟一時徵聘必致驚疑法應以漸延致且勿輕用奏調以杜羣疑

一應使全省人民皆知時事皆有保存本省之心皆知在上之意向宜令民間多設報館官助其力惟任意捏造則應設法杜絕

一應改正全省風俗開通全省風氣除勸設報館外更應注重全省小學堂此爲化民成俗之本

一應令民間成爲尙武之俗應使全省之民皆習武事並可寓武事於各事之中如學堂中有體操之類

一應預杜亂萌民間私會繁興涓涓不塞將來必成不救之症宜隨時設法解散不使有礙治理

一廣設偵探凡民間及省外並各國對待本省情形皆應設法偵探

### 一整理略述

一應設總務部爲一省政治總匯之區凡承上啓下及考查各種政事及各

府縣利病皆歸其辦理略如政府暫可以派辦處爲之

一應設財賦部凡本省歲出歲入及銀行賦稅鑄幣鈔票等事均歸其主持暫可以善後局爲之

一應設警察部凡稽查戶口及設巡捕包探並偵察一切均歸其主持暫可以保甲局爲之

一應設郵部凡鐵路電線驛務及水陸路事宜皆歸其主持今郵局電局雖已有人管理仍歸局中稽察宜另設一局爲之

一應設工程局凡營造一切皆歸主持可卽以舊有工程局爲之

一應設軍政局凡通省水陸將弁及武備學堂均隸焉可以營務處爲之內務疑應兼設輿圖局製造局

一刑法一項應暫仍舊貫俟諸事就緒再行斟定

一應設學務部凡通省大小學堂及派學生遊學等事均歸其綜理

以上各條已握政治大綱由省會以達州縣務使脈絡貫通無有阻礙各官



均有一定權限不得陵犯

一政綱既立然後可節次佈置謹具大略於左

一求地方之平靖必先清查戶口然後省會大鎮市以次布設警察使亂民不敢生心

一求官用之充足必先汰糜費清中飽先就向行賦稅嚴加清釐俟民間生計充裕始仿西法積漸增添

一求民生之殷阜必先勸工藝廣商務興屯墾再議招人開礦使地寶盡出  
一求財貨之流通必定錢幣畫一之制次通行鈔票然後開設銀行使一省之財互相貫注

一求民之開通及人才有從出之源應令徧開小學堂蒙學堂並多設報館  
一求人才之多除設立學堂外應多設閱書報處及藏書樓並派出洋  
一求固圉之道應將全省防營以漸抽練洋操其武營規矩均依西國之法  
使全省之兵皆一氣相貫並製造新式鎗械以備不虞

一預備將來戰事應徧測本省輿地至省外輿地以利行軍  
一求道路之通使商貨轉運靈捷應積極開治道途然後多設鐵路支路以  
便徵發

一求全省彼此消息靈通應多設電線有警卽知得早爲備

一應派人至旁近之地與之聯絡如西藏青海爲將來推廣佈置張本

汪穰卿先生遺文 書牘輯存中

弟汪詒年纂輯

上浙撫廖穀似中丞書

光緒二十三年

姚石荃孝廉久留鄂渚至浙之期尙未能定茲由鄂郵來所輯日本學校章程囑呈鈞鑒按此編規模詳備條理明晰雖事體極大未易猝舉然保國之道舍此未由若蒙採擇行之非僅一省之福也姚君尙在續輯各學校詳細課程及農工商醫各學章程當陸續寄呈鈞覽譯書之事如蒙見委當慎擇譯人力求精當費廉而功速以副廣開民智之至意

再聞浙省去年延請繙譯吳宗廉瞿昂來二人後聞改應香帥之聘吳又來申

兼就鐵路公司之事竊意向來繙譯積習最難整頓往往求取厚俸而譯課絕少既以能者少而居奇復恃主者不解而任意偷減其中弊病不勝枚舉現在舍弟大鈞擬設譯局於申以繙東文書爲主而英法文之要者亦以次繙譯至所繙之書則以關涉政法者爲先以副海內賢達講求新法至意惟集股籌辦

尙未能湊齊今吳瞿二人既不在浙可否將二人薪水除交蒙學公會繙學校書外餘卽按月寄申譯書局以資貼補至譯局收款若干及如何支銷必按月報銷以期核實可否之處伏乞酌示譯局章程現已付印容後寄呈

上廖中丞書

光緒二十三年

康年 於初九日曾上一稟並姚石荃孝廉所輯日本學校章程亮蒙賜覽昨晤葉浩吾茂才言及鈞意決計開辦小學堂且擬通飭各屬一體設立並令蒙學公會酌定課程開陳一切仰見育才新民實事求是之至意惟興學之事事關創始一切章程非可懸擬按日本小學規則極爲美備據農會繙譯藤田君云小學堂費一年如得銀三千圓已綽有餘裕外人每誚中國辦事費鉅而效寡此事似宜延日本通人主持規定一切兼法日本小學課程以期盡善至繙譯各書現上海東文學社學生已能譯淺近之書可令其專譯小學書籍所需津貼紙筆之費亦甚微細可否由浙譯局酌撥款項所費無幾已可編譯成書頒行各學卽由日本人選宜譯之書令譯後由日本人勘定再請中國通才校正

此事輕而易舉其於裨益人才良非淺鮮謹貢其愚惟祈採擇

上廖中丞書

光緒二十三年

昨得蟄仙同年書備悉一切小學堂事既蒙力爲主持又蒙籌撥款項屬蒙會編輯章程書籍等仰見育才訓蒙有加無已之至意茲由葉浩吾茂才與同人釐定章程鈔呈鈞覽<sub>康年</sub>按日本規制一切學校皆隸於文部省章程統由文部省釐定所用書籍非經文部大臣勘定者則教者不以教學者不以學是以日本小學雖多至二萬餘所皆斟酌畫一無有參差中國興學伊始未遑規定故同一學堂而一切規則課程北洋與南洋異南洋與楚省異楚北與楚南又異又各處章程未必盡善今制藝既廢學校必增若家自爲教人自爲學卽能稍有成效未得其會通欲求人才蓋其難矣同人所擬章程如鈞意以爲妥善可否卽行入告頒行各省垂爲定則又吾浙省垣小學堂辦妥後尙須推之各府州縣其府州縣小學之師卽可取之於省城速成師範學校庶可一律奉行省城小學課程不致稍有歧趨區區之見聊備採擇

再各省如開設小學堂再須設師範學堂不特造屋派員需費浩繁且須延請教習及管學堂之人一時亦難其選康年現與蒙學公會同人擬先在上海設立速成師範學堂已稍有頭緒各省有願學者均可送至學堂學習每人每年須銀六十元以康年意揣浙省籌款甚艱與其獨辦而費鉅何如送至申堂而費省且如送三十人則一年只須一千八百元此三十人中一年期滿各科學業皆可通達擇其尤者即可發往各府縣為小學堂教習在浙省可省費而得教習之用在申堂亦藉此得以擴充似屬一舉兩得如果以此說為然則前所云月貼五十金之說可作罷論因擬即教即譯可省譯費也是否之處伏乞鈞酌

上廖中丞書

光緒二十三年

承委代購東洋農具一節康年詢諸農會中人據言農具品類甚繁既須視地土所宜又須視教習之意趣必須先待教習請定再請其購辦農具方為款不虛糜且惟日本農師方肯用日本農具若延聘歐洲農師則若輩畛域攸分自



必向歐洲購辦至日本農師之薪金其由大學堂出身者月不過百元若歐洲之農師則尙不止此數又張香帥去歲曾向美國辦到農具計用去銀二千八百元云云以上皆農會中人所云合井奉聞以備採擇

致吳佩慈先生書

光緒二十三年

聞林叔元辦杭州鐵路業已散去不知確否吾鄉高口口與孫陳等四人初欲開杭州鐵路繼又開甯紹鐵路志意甚篤茲事關繫極大然觀諸人辦事奮往多而商推少近聞將與中俄道勝銀行訂借鉅款已定草約聞其中頗有不妥之處雖與弟不相涉然以關繫之大不敢不聞左右以轉達中丞師恐事一成將不能復止也(一)此事如成不啻允俄人在南方開一極關形勢之鐵路(二)招工購料均歸借款人承辦(三)諸人皆年少不更事不審將以何術制馭監工者(四)諸人辦此大事並未聞請精熟洋務之人商訂合同有此四端竊恐禍機之伏將不勝言雖以國勢衰弱無可挽回然明知其必不可而故爲之則將來之局面更不可問矣擬請廖帥電令該公司先將合同底稿呈允然

後准行庶無大悔吾兄以爲何如又聞草約中有一條云立合同後如中國人翻悔則罰銀四萬西人銀不應付則罰八萬又聞公司中中國人謂如有口杭州鐵路中止之事謂加陳其璋奏則當令洋人出面云弟所竊怪者此等事關繫重大必須身家殷實或識力精敏或工藝嫻熟之人今三者俱無一焉雖有一二身能得主也而輒令其承此重任豈不可慮聞各處承辦鐵路者大率如此甚至有以流氓而爲之者時事可歎實可累欷

上直督王夔石制軍

鄂督張孝達制軍書

光緒二十三年

康年 去冬與海上同志叛設務農會竊謂國勢之強由於富富之本源在工商工商之本源則又在農田種畜今日謀富之道較有把握者莫如振興農事講求本務矣春間曾與同志艸訂略章由錢念劬太守轉呈當已鑒及會中應辦之事條理繁多約舉之則有五端曰譯書報曰墾荒地曰試新法曰購器具曰立學堂五者之中當以譯書報爲最先立學堂爲最要而開荒購器試種等事亦須次第舉行此刻書報業已譯印會中同志又捐地千五百畝以備試種然

非立學講求難期實效顧才力綿薄需款孔多非得德位兼隆之人爲之維持不能有成我公德業炳蔚海內宗仰定能俯念民艱許以提倡凡在含靈翹企待澤不僅農會諸人已也冒昧陳請不勝悚惶董而教之幸甚禱甚

再去年讀華侍御

輝

請開農田水利疏探源立論頗中冑綮又孫尙書復奏大

學堂摺所立諸科農學居其一此均農務振興之機部臣覆奏華侍御摺有飭各省督撫臚陳地利情形之語未知我公已經覆奏否如能於覆摺內並將農會一事敘入倘獲俞允較易成功此事是否可行尙求賜酌不勝禱叩

致王苑生

孫慕韓

夏穗卿三君書

九緒二十三年

弟等客冬在上海與同志叔設農會大略情形曾登報牘想蒙鑒及惟開辦之始條理萬端同人聚謀約有數說或主先立學堂肄習化學以立大綱或主墾荒購器先求實效或謂宜製造肥料以代籌款或謂宜先譯書報立定根基再求進步首立學堂繼墾荒地然後製肥料造農器以廣利源而便民用學堂則募捐設立墾荒等事則借款興辦還清借款永爲公產如借貸不易則設開墾

公司成熟後以幾成歸股主以幾成爲會中經費此數說者次第不同用心則一然譯書印報實扼要之舉故此事已經開辦其餘諸事尙未舉行衆說旣多莫衷一是撮其大要質諸高賢孰後孰先尙祈指示且事繁費鉅籌款惟艱必有德位兼隆之大護法首爲提倡然後觀成可望因思夔帥名德碩望銳意振興而三君子卓識鴻猷睠懷時局欲求提倡舍是奚從且贊襄帷幄夙重超恂乘機進言必蒙允答倘登高一呼風氣大闢海隅負耒共沐恩施三君之功豈讓禹稷臨穎北望無任依馳

致朱亮生先生書

光緒二十四年三月

時事險口誠如來書所云而樞譯諸公猶以粉飾蒙蔽爲得計尙得謂之稍有人心耶膠州割棄之後俄於大連旅順亦踵其策而英由國家假巨款邀重酬旋忽然變爲商假而所索如故此以八十兩零五錢爲一百兩其險中國甚矣如法又師英而索兩粵利權及通鐵路於滇又索長江中屯船處所凡四條聞日本將索威海人則得大利於我而尙居大德我則失大利於人而自謂得計嗚

呼庸妄誤國何至此歟又從前之興廢僅關一代今則大局一傾永無復國之日故今日同志實應以設法留一二省地方足存吾種教而貧者力不足富者大率保家畏事誰則與謀又各處風氣不通且本無權柄不知從何措手然今日爲之苦于無助迨至事變日亟人知此說之善必無及矣吾國上下夢夢良爲可歎且康年意謂今日第一朝廷自能整頓其次則督撫中有起而任其責者亟於力量可及之處設法預備最下則素稱強悍之省分由民間自行設法清戶口理財貨阜農工辦團練利器械以待變中國政體不甚干預民間之事故人民可辦之事甚多惜無此才幹立公司以保商埠巧華商助巨款於公司爲購船械練人才之用又購數船通商各國須平時可改爲兵船戰又選俊才使學於日本取其便宜亦如是五年或可有濟然爲之甚難同志又少不知此願能償否也至於聖教爲吾國植基之地自應協力護持使勿墜地蓋深慮吾國全土如果爲臃腥永踞則必識西文西語而後能餬口又雖不禁儒教然必使習西教者較爲便宜於是吾文字亡風俗亡而語言宗教亦漸漸以亡於是吾族且爲異物爲野蠻且爲美國之



紅皮番故近日之事尤在多為聖教書及各種初學書必使將來人人能識西文作西語諳西學而仍人人讀聖教書明五倫之理方足以存吾種而為將來恢復張本所可痛者中國向來不以口口傳教為意且向來言教上及士夫而下不及民又自乾嘉以來講理學服程朱者寥寥躬行實踐甚鮮其人欲得一主持教務之人誠戛戛乎其難之（下略）

再現在各處學堂漸次開設然往往以西學堂或中西學為名頗有偏重之虞中文啓蒙之書又甚少又談時務者往往有專重西學之論若如此辦去必至將來子弟既不知中學為何物而西學亦僅得其皮毛甚可慮也似宜將各經

各史悉作一種啓蒙書初學書白話書此為未通文集名流訂成定本專為學

堂之用近來有志於此者頗多宜有總匯之者庶使承學之士不必讀難讀之書惟論孟宜熟讀禮記左傳宜節

識餘經但至學成誦數過可也而於古聖賢之理及中國古來治亂興衰之故皆了然於胸次

實為目前切要之舉先生以名德鄉居不知能約集同志為之否蒙學報有益學人而苦款之絀甚望海內賢達資助若得先生一為提倡則欣願甚矣緣葉




君以一人爲此勞憊甚至往往徹夜不睡雖偶有偏口之處然其用意實是爲公故深冀其成而惟恐其或敗耳

致歐陽雲衢先生書

光緒二十四年三月

來書謂宜集同志上書瀝陳得失此誠弟等所不敢辭顧惟彼庸瑣振作何期若欲革舊布新又難望之今日此事同人亦必舉行大約最好亦徒得似行非行似聽非聽之論旨而已近自允德佔膠而英法俄羣起如犬爭骨距發書時之國勢又不啻天壤懸絕嗚呼吾國大臣不知振作不知虛心講求其得此荆棘宜也顧奈何我四萬萬人而悉送其死命哉今日之事宜以盡易樞譯別選賢良爲第一要義否則遊說海內有聞望之督撫使之聯數省以變法自強又不能則風氣強悍之省分由督撫奏請便宜行事因聚豪傑籌自固之方最下則凡形勢可扼守之省分其賢豪紳士約各府縣同志自行設法清戶口理財賦阜農工辦團練利器械以待變中國政體不甚干預民間之事故民賦事甚多惜少才幹耳又應集巨款爲購船械練人才之用如是五年或可有濟然爲之甚難同志又少不知



此願能償否也

致蘇松太道蔡和甫觀察書

光緒二十四年

近日四明公所一案聞昕夕壁畫賢勞懋著又聞近已檢出昔年要據法人頗有轉圜之意此事漸可就緒欣慰無似竊謂此次肇事發難於法公董局雖曰挾其國力藉端啓釁亦由中外人情隔膜所致假令彼此情意稍通必應和衷商權不至率爾從事致成騎虎之勢查上海治理租界之權全操之於洋人然洋人人數不及中國千分之一工部局歲入之款亦以華人所捐爲大宗而公董局中絕無華人插足故處處獨斷獨行悍然不顧動輒爲拂逆民情之舉致滋事端在我固極不便在彼作事亦多枝節似宜急籌善後之策以銷患於無形查香港新嘉坡等處凡華人多者其工部等局中必有華人爲之董事以達彼此之情況上海爲中國通商口岸公董局中豈可無華董以維持商務大可乘此時機與彼國領事剴切商辦並告以若有華董則彼此交情益密於主客均有裨益想彼亦無以相難也管見及此謹以奉商乞賜酌奪爲幸

上晉撫胡聘之中丞書 光緒二十四年

前聞盛怡將闢蒙地實是本原之策

惟今日日報言中國許英山西曠今農會地萬里令得開墾田不知確否

在杭州鎮江如皋各得撥沙田一二千畝而上海又得田十餘畝現擬延日本上等農師在上海開設農務學堂講求農學並化土質辦土宜仿製肥料仿造農具並試種各種植物又於杭鎮如皋三處各撥田五十畝由農師派日本老農前往試種必令農務日進農利日厚而後已其各處所得沙田須招人墾熟再收其租以資學堂之用惟開辦伊始尙須籌款現已與江浙各大府商籌款項以資興辦此事由民辦理自較官場簡捷我公有志振興民利而於農務尤爲關切惟欲講求農務自不能不研究新法然使各省分道講求則費鉅力分又多費時日不如併歸一處俟有成效再分設各省似較有益如蒙俯採斯言則擬懇設法提倡俾得速成實所盼切

再農務而外勸工實爲至要

康年

去臘往游日本察得彼中於工藝合用之機

器等事往往有變通之法或改鐵質而爲木質或更思簡易之法故價格便宜

民家易於購置如上海新購來之縲絲器大僅三兩元小僅一二元可謂便宜之極康年擬籌款將日本各種機器盡行購來陳設一處試驗其最合用之器卽廣勸人購用待其通行然後再勸人自造此法有二利一本輕則易購二民家可各人自辦不必造廠又日本近來極意與中國聯絡凡學堂農務等事無不肯代出力並查在彼處大學堂讀書每人脩金及房飯等每年不過三百元查得日本於各種學校均極認真如派學生往彼肄業費甚省而功相若今兩湖及浙江各擬派人往學武備浙又派人學蠶務我公志在培植人才如行此法似較省便且但須貴省備文交康年轉託日本領事卽可照辦

上江蘇學政瞿侍郎書

光緒二十五年正月

去歲秋冬間中外幸得無事實爲至幸然國家政策猶鬱而未融草野中猶未釋望若得將康黨新黨截然分爲二事渙汗大號丕發新猷則亡羊補牢猶未爲晚惜無能以此說上陳者海內學堂等事寥落三五固非維新亦不全復若羈縻之以待他日之用似亦不無小裨農學報館得南洋助以巨款尙可勉力

支持速成教習學堂現擬將章程改正約如日本中學堂所選留學生十餘人  
均篤實向學此堂爲仁和生員葉浩吾辦辦理收貲既少每月脩膳住又無官  
款去年以來頗備嘗艱苦今年因諸生都已小成且所延日本師係東京大學  
生見有成效不欲中途棄去故不得不勉爲支撐擬請夫子大人向蘇州當道  
設法略撥官款貲助學堂使得有成就則皆吾師培植之力不勝企禱竊見近  
來各省開設小學堂歲費動輒巨萬或至三四萬而所收學生不過三五十人  
此間若得官費二三千金已可收學生四五十人蓋華樸旣殊斯省費迥異夫  
子大人樂育爲懷故敢陳其說

上江督劉峴莊制軍書

光緒二十六年

竊

康年

頃日客遊秣陵忽聞有被人誣陷之事卽起程他適幸蒙福蔭得脫網

羅足慰廩注

康年

得耗之時本欲隻身就逮繼思

康年

分雖微末亦嘗策名於

朝若以此等荒唐之電而貿然赴質使銀錙被體五木關身不特有傷清白之  
軀竊恐東南士大夫從此人人自疑於大局不無妨礙故祇得高翔遠適以避



斧鉞之威至此事虛實有不難明辨者康年雖未深識時務然固嘗讀詩書知  
理道古來豪傑之起咸因人心之離叛今雖內訌外衅交乘迭起然率土咸戴  
一尊無有二意是則理無可執一也北省雖已糜爛南方猶復完固人安其業  
商忱於禍若違時妄動將致人皆讎敵是則機無可乘二也東南大府與各國  
立互相保護之約將由此以靖北亂而成和議若民間偶有蠢動則外兵立至  
將由此盡失國權是則勢無可乘三也或謂康年前者嘗與同志創設中國議  
會指為與中國國會彼此應和不知議會者係仿歐洲各國之法專議國家政  
治必須政府允准方能舉辦是以雖集議一再旋因各大府皆不允提倡故即  
停止與中國國會名近而實異是則事非相關四也至或電稱康年勾結革命  
黨人又或指康年勾通江湖中人非特誣讖之無因抑亦儕偶之不類非意存  
傾陷即緣於誤會是則擬不於倫五也夫營難成之事而居至惡之名馴至上  
下咸嫉內外交攻康年雖至愚何至出此且尤有實事可明其不然者康年自  
北禍之起頻月奔走江表五月至鄂以剿匪効政府之說干南皮制軍旋又至



江甯亦以其說請同志達諸台座李傅相至申則合同志上書請卽率兵入都  
以勦匪爲議和之根本七月又至江寧與同志商量欲請公舉兵入都護衛兩  
宮因以彈壓西兵主持和議以爲時已遲不及上達而止以上諸說雖多迂執  
不可行然大率歸重於朝廷致望於督撫假使康年而果有異謀則安得復有  
此寬閒之歲月暇豫之心思乎又豈肯爲此自相阻礙之事乎而忽有此蜚語  
者蓋以口口事敗之後彼中人多有疑康年發其覆者遂欲甘心於康年並或  
發電之人誤聽其說遂有此鹵莽之舉本應懇求嚴究科以反坐之罪然康年  
忿其無狀亦憫其受愚故不欲與深較惟請我公於旌別淑慝之中仍厲保全  
善類之意而於人才之品類宗旨之同異尤再三加意則士大夫幸甚大局幸  
甚抑又有進者中國向來風氣官師之最人士父兄之教子弟咸以謹飭爲先  
然謹飭之人與跡弛之士二者各有所用不可偏廢治平之世謹飭之士卽已  
足用至亂世事變之繁多或非跡弛之士不爲功顧跡弛之士常足以招疑謗  
致讎敵何則其採聽廣則交結必雜其物色多則形跡易淆其論議橫則易驚

流俗其志意堅則易招疑忌是在在上者有以分別而保護之斯足以養成其才器若以形跡疑似之間語言文字之未偶得一二人之論列卽與以深罪人才幾何不將悉投羅網哉倘蒙採納宣其冤誣則康年猶得全性命於清時效涓埃於異日如不見鑒諒則康年當在山之巔水之涯不得復爲國家效其尺寸矣若夫假託外人抵抗本朝侮慢官長則區區之義必不爲此康年一身不足惜特恐循是以往動輒爲是不特將釀清流之禍亦恐離心解體之禍應時而見實爲可慮

致蘇松太道余晉珊觀察書

光緒二十六年

前月由郵局奉一函知荷鑒察嗣得江寧消息知峴帥得弟函後見賓僚輒謂前者實係雅意相延欲面談一切並無他意足知峴帥於弟實無纖毫猜疑且峴帥於弟素相知重亦斷不至因一二簧鼓之言輒爲搖惑此事弟信之想閣下亦無不信之乃近月以來危疑恫喝之謠不一而足或謂銜恨之徒將於狹路快意於弟已而又謂招安之徒將以捕弟爲功後且謂由伊等列上姓名請

加嚴捕近日則又加甚謂官中名捕四人凡得一人者輒以千金爲賞並賞一武職流傳萬口愈播愈真有謂已經領事認可者有謂已由峴帥電商各國外部者此等夢囈狂謬之談實屬可怪可笑查向來官中每捕人犯必是確係犯有巨案證據真確者如虛疑不實之事卽不能如此辦理至於名列縉紳尤當從慎國家愛惜士大夫理當如此也竊謂峴帥卽動於人言亦斷不至有如此舉動此必招安中有數人旣得免死又將邀功而真黨又不能指控於是擇名望稍著之人而無勢分無黨援者列上姓名影射呈報希圖功賞此等貪狡無賴之人向來如此不足爲怪夫招安之事古以爲難其初但求免死其繼必希官祿償少則失望勢崇卽翻覆荼毒士流侮慢縉紳在所不惜聞目下伊等奉有捕拿會黨之命頗肆訛詐手段前曾輾轉相諷謂如某某出數百金卽免連累其藉端索貲已可慨見弟固不懼此竊恐伊等指此事爲標準欺詐善類勒索鄉愚無所不至敢希閣下嚴諭諸人安靜營生勿得藉端擾害實爲至幸假使上游果有如是舉動則試問弟安居海上果有何等劣迹致遭如此侮慢昔

人自愛其鼎弟亦必當將前後實在情形廣爲剖白俾不致混淆如何之處伏希察示至感至禱

上江督劉峴莊制軍 鄂督張孝達制軍 粵督陶子方制軍書

光緒二

十七年

再中俄新約載在日報者與前訂密約仍是大同小異以理論之我國自應力與爭執惟昨日字林西報載有榮相致合肥書中言宮廷因得俄保護將允俄約此說揆之情理恐非無因如是則非特開作公地之說不可行卽聽俄人自據不與立約之說亦不能辦到聽甘言而受實禍自古及今未有如此之甚者竊謂以現在中國權力而論雖不能將密約全改然如第一條中云將來中國如添造支路須先由俄政府酌定再辦云云第三條中云商權礦權鐵路權中國如有擴充開採等事須與俄人合力辦理云云此二條尤有阻礙擬懇我公聯合各省督撫電奏朝廷飭令全權專就此二條力與磋磨務令刪去如此則他日中國果能有強尙易設法收回自主之權是否有當伏乞裁督

上江督劉峴莊制軍 鄂督張孝達制軍 粵督陶子方制軍書

光緒二十七年

竊見日前上海各日報載外洋路透電報有葡萄牙因與中國商量澳門劃界事宜派兵船一艘及兵三百人來華並有須索取香山之說此事是否確實尙不可知惟本埠西人之識時事者則皆謂葡人國弱志淺必不能舉此事是必有人唆令爲之今俄人方肆鯨吞於新疆東三省一帶法人已竭力經營於廣西雲南一帶今若嗾葡人爲此是又將亂我南服而與俄相應援中國瓜分之禍恐將始此

康年竊意西人之說卽未全可信然以葡人之弱澳門劃界之事十四年擱未提及今忽有此其必有援助者可知然此事關繫至重萬不可視爲等閒我國雖積弱然以葡之蕞爾尙不足畏我海軍船雖少究尙遠勝於葡竊謂宜一面預爲布置並檄令土人辦團一面飭海容海圻諸船至港澳海面停泊先占形勢如葡人來請勘界卽派幹員與之商辦尙有意外要挾仍應堅持不許萬一不允寧與失和葡兵寡弱口之不難法人卽或暗助斷不能明助且必不能多助如果能卻葡請則外人見我國此時尙能堅執主意足見主持



有人他國因此或可隱戢陰謀否則外人謂我遇一葡萄牙尙且怯懼則他國何不可肆意蠶食之有竊恐因此遂召淪胥之禍事機危急莫甚於此惟願我公俯採芻蕘決心斷行實所至盼又聞近日意大利擬辦松江至江西之鐵路而盛丞堂特爲向浙撫商辦然據西人之言則此舉非僅鐵路而已且非出意大利蓋英欲規謀浙省使與江西連接以擴充已長江兩岸之地故嗾意人出面爲此竊意此事浙撫本可以暫緩推却以後徐自設法亦乞電商及之

致陳雨蒼京兆書

光緒二十七年

夏間不揣固陋妄有陳述辱荷賜書獎誘備至亦卽肅覆達其所見時局艱迫未有所底中朝大臣能實有志於振興者不一一數故弟雖窮居海上然每翹首北望默念支拄危局之大臣必數及公每與人言及正色立朝之大臣亦必及公然則康年所望於公者宮廷之闕失惟公能匡救之官司之叢弊惟公能抉發之新機之壅遏惟公能振掖之不意近日公奉命查察工藝局一事竟特請停止別由官辦又有禁止京話報一事反覆思之實不解何故今當除舊布



新之始惟恐事之不舉力之不出故凡能辦一事能創一業者朝廷當獎勵之不暇何可妄施禁阻使好事者懼袖手者喜若謂所關者大不應由革職人員請辦不知新政中事務繁多非一手一足之力所能爲也若皆欲由官治之不特官中無此人才且亦恐不能遍爲也又况工藝本民間應爲之事豈可禁阻若謂承辦之人恐未盡善故禁之而由官辦不知此係招股興辦之事爲之而成則股東得利而承辦者受榮名爲之而無成則股東失利而承辦者受惡名官但任保護之責而已得失兩無與也况我國承辦一切之事未盡善者多矣開礦則一成而百敗公司則旋成而旋廢至若招商電報外形雖具內弊滋多何嘗以其辦理不善而禁之乎若謂事由官辦則有所責成有所稽考較之聽民間自爲勝之百倍不知向來官中辦事無一足信於人故人之不信官也數十倍於他人况茲事極爲瑣雜公職任宏重何暇及此不過徒增名目徒增苦累而已且卽由官設立矣民間復設一局於事何害如謂義倉爲倉儲要需則令交還倉屋別覓廠房可也若謂官已自辦且非官款不必有奏辦名目則許

其自行設立無庸奏請可也今一切不言而獨言不准辦則是有意使任事者  
爲難也豈非寒天下志士之心乎至京話報於開通風氣勸化愚蒙最爲合宜  
今朝廷整頓伊始實應准民間開設日報昌言無忌庶足新遠近之耳目振上  
下之膽氣挾公私之積弊僅此京話報已嫌微軟今并此禁之康年實不解公  
所執何義竟忍而爲此嗚呼吾國復振之機若人始孩若木始萌今公不亟長  
養之而恣爲凌踐以快不悅者之心天下其謂公何後世其謂公何或者謂承  
辦是事者有不洽於公遂得此咎康年不敢謂公懷是褊心然實亦無從爲公  
辦矣嗚呼近日最不洽於人心之事爲辦差之鋪張文告之誇飾從未聞中朝大  
臣有出一言建一議以補朝廷之缺失者而獨於在下者急公好義之事則首  
先禁抑康年雖欲百口爲公解說亦無能矣顧康年屏居海陬都中之事或未  
周悉慮或不得已而出此乎抑或仍寓斡旋之意乎故輒不敢自逸走筆遙叩  
其實不知公得此紙亦諒其惴惴懷顧之微意歟抑視爲無足重輕而棄之也

康年不敏敢罄其愚

近日各國與我商訂商約此事在不知者視之必謂各國雖因此求商務之進步究之其利害不出商務之中其關係不若和約十二綱之緊要殊不知今之辦理商務卽從前各西報所謂洞開門戶又謂之敞門通商蓋收拾吾華之結穴而爲實施暗中瓜分之事其利害關係之大東報言之甚詳且和約之事或有因彼此利害不同可借彼以阻此借此以抑彼商約則一進俱進人人俱欲爭前必無退後之理近日各國均派專員至滬查辦此事各有其專指之利益而皆異常機密惟我國特派會議商約大臣亦極嚴密則康年竊謂未然蓋商務事宜有必須商務中人始能深悉若不將各國所言之事宣示大衆使商務中人得熟計利害隨時陳報則議約大臣何憑爭執蓋如果概從彼約則不特民間生計悉爲彼奪卽國計亦隨以俱困由是一切政事無從設施兵則無財可練學堂則無財可設目前最要之賠款亦無可籌措將來不亡之亡且終於亡又且并其種類而亡之禍亂之慘有不忍言者今擬懇我公電商議約大臣乘開議之始力與磋商並隨時將各國要素之款宣示商人使得籌議若不能

明示亦可隨時由日報暗行透出則遠近商人並事外之人均可據報審察將利害之故如何辦法隨時向議約大臣稟報俾議約大臣得據以爭辦或冀得挽救萬一


再致陳雨蒼京兆書

光緒二十七年

初四肅奉一函力爭禁止工藝局事諒荷照督彼時因一時意氣出語不無過當嗣讀順天時報載公原奏始知禁止之說本非公意至京話報停止亦查知因不能支持而自停非出於禁令康年一時未知底裏遽爾函爭實屬舛誤惟公亮之顧康年尙有不能已於言者一則當此新機初動之時苟有起而辦事者上之人當保護之獎勵之若過於精核過於淘汰則後來者皆將裹足不前矣今原奏中有必人所信從始克集事將來能否就緒未可預期等語是則預存逆億之見使局中人無從着力局外人由此裹足於新機實爲有礙覆奏中有總其成者不參私見事方可行等語是徒多挑剔之辭絕少保全之意雖無請禁之明文實已寓請禁之意矣一則此係紳商集股興辦之事考核之權自

有股東主之無庸官中過問覆奏極宜申明此意俾朝廷知商辦與官辦不同之處則自不致有禁止之事今於此不能致詳而獨暗寓不甚妥協之意是不啻明明請禁矣一則民辦官辦極應劃分爲二若民辦而貌爲官辦則不免有把持影射招搖之弊黃學士原辦之法已嫌界限混淆今覆奏不從此指駁而反謂紳辦官督則流弊不滋殊不知此最爲弊混之事而乃以此爲說是不啻變本加厲矣一則屯儲糧食固途工藝局之界限然或因初辦賠累太多不能不藉此津貼則情尙有可原而遽謂必應停止是已不禁之禁矣一則卽謂辦事之人諸多未妥亦須別行設法不着痕跡而原奏覆奏均不注意於此致海內見此等舉動皆妄謂此等事非朝廷所喜相戒不爲是則提倡之意少遏抑之情多矣至謂開局宗旨全在養民不同謀利斯實不免小誤蓋辦事人不可有私利之意而局中則不可無利使得自養使得擴允而局外人亦得所觀感今以不同謀利爲說是徒博不牟利之美名而忘不獲利之實害康年非好爲論議實以我公負中外人望居心行事皆足使人而此等緩急輕重之宜或不

免千慮一失故特一再率瀆自附於諍友之列公或不斥爲多事乎





汪穰卿先生遺文 書牘輯存下

弟汪詒年纂輯

上瞿中堂書

光緒二十八年

前讀邸抄恭誦奏請解任一摺仰見我師慎重進退不苟榮利之至意莫名敬仰竊謂古之大臣當剝極之時處樞機之地其去與留皆有至意存焉非苟焉已也假使留而足以遏宵小之謀繫天下之望則雖讒謗叢興事事艱棘亦必不去固非徒爲保全善類也而尤非有勢位之見存其中也假使去而足以動當宁之心明吾道之重則雖溫詔慰留同列固請亦不肯留固非徒欲自潔身名也而尤非因畏難而然也竊見今日宮廷蓄意蓋有二端一則謂外人已與我交好可無他慮一則謂事已至此無可挽回姑謀目前之樂二者皆足爲亡國之基竊謂我夫子大人宜再陳奏力請開缺大旨謂今日之事列強並起而猶可敷衍亂民蜂憑而猶可遏抑治理雖焚而猶可整理財政雖絀而猶可籌劃惟是朝廷不實行臥薪嘗膽之言而以戲渝懈衆志大臣不深維扶危定傾

之職而以邪沮失人心賄賂允廷讜論塞耳凡斯有一足致傾危况夫極備誰克匡扶如斯立論意必有動容於深宮之內股弁於入對之時者矣如果克轉天心固如天之福卽因此得請亦足表心跡於天下後世否則但用時事危迫才不勝任等語非視爲辭職之套語卽謂時勢之實然漠然置之不以爲意與前所言固有若九鼎之於毫毛者矣康年忝蒙愛賞無可自效謹就意量所及貢其一得之愚伏乞不棄葑菲俯賜採擇不勝翹企

諭年

按據光緒東華錄載二十八年八月壬辰諭瞿鴻禨奏瀝陳下情請開去重要差缺一摺現在政務殷繁交涉均關緊要全在諸大臣同心協力宏濟艱難樞臣朝夕在公其居心行事朝廷自能洞鑒該尙書辦事認真不辭勞怨惟當夙夜宣勤力圖報稱從來任事之人不可存引嫌之見所請開去差缺之處着無庸議云云故先生復作此書上瞿相國力以辭職爲勸云

致張劭熙

朱桂辛二君書

光緒二十九年

昨見報知盛宮保電催政府速備三百萬收取商股免爲外人收取又盛以他

報謂電股大半皆在盛手盛卽屬人來館請報代爲聲明盛所有電股陸續抵押外僅存十餘萬而已云云究竟是否實情實不可知惟合此二事觀之難保非盛覬知國家不能籌此巨款伊卽乘時將股押與外人或用外人出名使國家必須照時值方能購回竊謂宜電令盛飭該局登一告白於中西各報並知會股東所有執有股票之人如有售於他人限於幾日內將股票已售某人報局過期卽不得出售外人庶可杜絕此弊惟弟意此事究不合公理於商情大爲震動惟有仍如前函所云利權歸商由官稽督稍可補救萬一旦電報係全國通消息之事應隸郵部斷無歸外省督撫之理招商應歸商部亦無歸北洋大臣之理昨見報載袁擬國家官銀行亦以天津官銀行爲本行此事實可怪詫此係戶部之事何得讓之疆臣且如此則袁於兵權之外又握大利權且得郵權意欲何爲弟謂爲國家計爲師座謂羅計此事當再三審督如欲任其大成當一切聽之若以爲不可則宜預爲阻遏否則事權盡在一一人一旦禍發悔將奚及請兩兄卽將此函轉呈師座以備葑菲之採

再現在伍秩庸星使接議商約以來遇事均能抗爭第一日開議日本日置君幾爲失色蓋不意華官居然能如此在行也至日置開來各款伍俱隨事指駁有舉重若輕之狀若外務部更能力爲主持或尙可挽回一二此事極爲緊要乞轉達師座爲禱

今日見諭旨因川督岑奏陳光弼不交認墊之款着各督撫限令繳出此事實足令富人灰心墊款與尋常款項不同乃致如此嚴重足使天下寒心而以後報効及捐款之人皆裹足矣今日方欲勸海外華商至中國經營商務又欲激勸富人報効而所辦皆使人短氣之事實不可解

至天津鑄一兩重之銀員實足紊亂錢法如此則舊時七錢二分之銀圓將置之何地宜速議

現在華人以內地各礦私自與外人訂約者無慮千百宜設法飭人暗中查取實已訂約者究有若干章程若何路礦局亦宜定一中外可守之章使人可遵行

台州海門廳之煤礦極佳前有都司林賀初都戎飭營兵私行挖費現與官紳某省知州葉某欲招意商辦理意領事聞之甚悅因其地近三門灣也鄙意宜速下諭旨令各處礦山之欲招外人合辦者應先向路礦總局掛號方准訂約如此稍免流弊至報効及驗貨西人優爲之而華人則力不及宜刪去再現有黠者先查何處有礦山卽向山主賤價買得或租得再向外人兜售獲利極豐宜定章凡五年內所購之山將來所得之利宜歸山主一半

致朱桂辛先生書

光緒二十九年

昨聞東三省開爲口岸一事本初大肆阻力謂不允俄亦不允英美方昭公允此語大爲乖口聞本初好用舊時美生疑此亦聽彼熒惑之語也弟前函力破此說兄想必以爲然昨有最熟外交之人力謂中國現處萬難之會宜出不意許英美日東三省開爲通商口岸之舉如此則三國必喜我等卽與之密約如俄有他種要脅則彼等必須幫忙俄人雖怒見我處聯絡已定亦必有所顧忌又俄不得志於東必將肆志於蒙藏彼時可再與英日商一法却之總之彼無



辭可以對諸國也至俄現亦屢以新疆蒙古爲言然此乃彼故意用閃爍手段使我意思疑惑須知彼本意實在東三省其視東三省重於蒙古十百倍也惟此法須斷須速否則俄形勢已定日本必不用兵英則主意不定美則但須俄啖以小利亦必無言如此則我東三省折入於俄至是英美始大悔必爲桑榆之收而佔揚子江佔粵等說起矣而德佔山東法佔滇桂日佔浙閩所不待言然又不能平平過去也又必有無數爭辨無數波瀾不知吾師謂懼彼時仍日日至外務部與之從容剖斷乎抑至彼時始從容投劾而歸乎至俄人近日不與我亟爭時作若引若拒之狀時作推宕延緩之語彼非有所畏懼也蓋將乘此而固東三省之防且安排各國也一旦勢定輒下訓條於我直令我一切遵依我外部大臣卽欲與爭尙敢有他言乎至處置新黨一事弟前函屢言之亦常與他人言之而竟無信我者端中丞至照會各處指明留學生卽革命黨其不知作用一至如此竊謂卽使義勇隊有與革命黨通連之事朝廷宜作爲不知一面獎勵一面慰撫使勿輕動此所謂因而用之旣以離彼之心且假以激



勵天下也

致張劭熙 朱桂辛二君書

未詳年月

昨見津報忽言朝廷擬改服色將於明年元旦下諭旨此事極有關繫因亟爲此函請轉達師座欄改服色一事近人雖時言及然弟極不視爲要圖且朝廷果能實力變法則改服色或足助變法之力量若不變法而徒改服色則變法一事何補存亡之毫末徒足取笑而已從前日人改服色亦頗爲西人所笑且若在從前風氣未開阻撓者多如朝廷毅然改革則改服色足以示力量易視聽今當喪禍之餘民情趨外卽此一節徒足表示朝廷媚悅外人之象况此事關繫民間生業者極大倘頓解長服而爲短衣易綢緞而爲呢羽則凡蠶桑繅織諸人立有擠溝壑之慮而進口貨則所增奚止千萬今國內虛耗方須爲小民籌添生計何可更爲此抑絕之法致民生愈困籌款愈難尤有慮者日本之人與我相類其來華者大率無賴今衣服殊異尙復時肆貪口滋事誑騙時有所聞若一旦服色亦改而相同則日人可隨時混入內地與華人相混爲種

種不法之事而華人之能日語者又可自詭爲日人敲詐平民以日詭華以華詭日何以待之又一人之身忽日忽華又何以待之徒滋事故多速獄訟甚無謂也若朝廷之意已定不能挽回宜令惟在官場之人公服一例改革其官人常服及平民不在此例婦女亦不須改其官場公服雖式樣改變仍須以綢緞爲之如此則保全尙多惟冀師座力言之不勝冀盼總之此事實係小節無關大局與請西人宴會及開茶會徒足爲媚外之憑據而已兩兄聞弟此言不知亦目爲迂闊否

上呂鏡宇尙書書

光緒三十年

革命黨一事朝廷處之無策化之無術制之無權橫潰決裂現在辦法不啻國家與民間爭訟於外人之公堂言之可爲痛心矣所謂革命黨者不過一二豎子主持其事耳其囂張悖慢正其無識見處卽或有張揚煽惑之事亦殊不足大驚駭辦理之始苟得握要之方而不多誅求則波瀾自不難立定今都中捕殺沈蓋外忽又有捕楊度之事又聞有言官劾楊道霖俞陞雲端緒等四人之

事於是遂有徧捕留學生之謠又有將株連新黨之謠夫經濟特科者朝廷所以待非常之士而尙不免於捕劾則海內稍講新學之士誰不寒心聞現在都下人心皇皇江浙子弟留學日本以暑假歸者咸懼株連之及至欲避往他所前月此間事初發時固明言惟拘數人耳而已有某君聞風而遁去者又蘇州某君以其子爲留學生有新黨之目乃送之官請永遠監禁之以免傾家之禍者夫人情騷動如此而在上者不速有以底定之可乎且指全國新黨爲革命黨固亂黨所深願也求外人爲己護符固新黨所自爲得計者也故前者蘇報捏造諭旨卽有徧拿留學生之語蓋欲以是誘致留學生使從己也今朝廷既有徧疑新黨之形態此亂黨所最得意之事也在海外在租界則雖悖慢不敢捕治在內地則縱意殺之則人皆以居租界爲得計而新黨愈聚矣馴至其極必致全國之新黨皆聚處於租界而亂黨益恃外人以詆詬朝廷我國上下相爭則必有收漁人之利者矣竊謂國家實無多殺新黨之意而惜乎朝廷之上無主持不殺新黨之人於是不解事之人爭以多劾新黨爲取悅朝廷之計則

株連窮究將無已時故夫爲革命黨之言者妄人也隨意指劾新黨者亦妄人也二妄相值以構禍則亡國不難矣敬乞我公勿輕視此事宜速電致朝中重要大臣或竟奏諸朝廷大略謂新黨意見各歧且勢極散漫惟其人甚多不可徧治若急之恐聚而求庇外人抵抗國家其於大局關繫非淺請速下明詔不許株連則彼黨既失煽惑之資必相解散云云如此則不特緩目前之禍且與從前送留學生至日本之本旨亦不相悖

康年

以素蒙不棄故輒貢其愚惟公

密察焉

上鐵寶臣尙書書

宣統元年

康年 爲國家計久長則以此時經邪說充塞肆行之後各處人心浮動每易爲浮言所惑今當冲聖嗣位之初非有一二設施足以大愜民志則不足以固結人心而散邪慝今年以商務疲憊各處銀根業已大緊乃匯豐忽於此時將放出之二千萬收回而漢口黃氏三錢莊驟倒三百餘萬上海源元倒六十餘萬晉益升倒百廿萬於是富家競向莊號提款其未存放者輒閉不敢出各埠蕭

索已至極點竊謂今年市面之壞非盡由財源涸竭也實以倒帳與收款二者交乘致成立槁之勢也設於斯時而有蘇其涸轍俾今年得以扶持而來年得以接續則其感激踴躍必有不可言喻者我公深爲國家根本之計宜與同朝王大臣熟籌至計請於朝廷稱述遺命迅發內帑二十萬交津申漢等處戶部分行轉發莊號爲周轉市面之用俟至明年春夏仍陸續收回備辦新政之需如此則國帑無纖毫之失而商民蒙再造之恩有此淪肌浹髓之大德則雖邪說百出孰得而動搖之再今日見各報所載知京城市面已蒙發帑得資蘇息若更德音普徧廣之各埠斯爲澤愈徧又今夏上海西商已有相約不用中國鈔票之說經南洋大臣擔保始暫允不宣布近日聞又提議慮必達其目的始止且近年各種鈔票濫發無節適爲外人口實而今年匯豐明知商務不振忽然收款蓋實欲以此試我商力之厚薄而又欲不用各種鈔票是則一面將操縱我全國商務一面又欲停我之鈔票而用彼之鈔票若我不察而墮其術中則從此我國財權將盡入其掌握欲破其術宜卽以此次發交戶部銀行



之二千萬永存銀行作爲發行鈔票之基本金逮鈔票發行將各種公私鈔票官錢票盡行收回俾外人無可藉口且戶部銀行亦可時以此項巨款活動市面如此則向來匯豐之權均歸之戶部矣惟外人之挑剔各種鈔票已在目前而度支部之紙廠印局尙無成立之期則或先行限制各局號鈔票而擔保現行之鈔票以安中外商人之心一俟戶部鈔票發出卽行收回似亦可爲權宜之計此係爲握商權杜外謀起見敢乞俯賜裁擇不勝悚息之至

致志仲魯先生書

以下發書年月均無可考

近日時局又棘於前厝火積薪尙非其比不審當局諸公意想何如竊意居大位負人望而權力又足轉旋機軸者惟榮相耳海陬餘生欲有所陳獻輒又不敢告之他人又疑於狂惑公滿洲右族宜最關休戚姑復一言或得陳其說於當路乎今日大事所最可慮者英俄交合則瓜分勢成吾國無論滿蒙回漢皆將有淪胥之慘然遂謂挽回無策則又不然惟勢已大衰落非有非常之舉出不意之事不足以振起全局驚悚羣雄然其事太巨條理萬千此時不能言亦



不必言姑舉其大指約四五端一曰請降懿旨宣言盡變舊法須愷切痛徹言之二曰宜降懿旨派我皇上親至各國遊歷隨帶之人有限考察各國政法一年歸國再定變法之事三曰宜遴選明通公溥之大臣爲宰相總理內外事宜以一事權四曰宜選明白政法之人入京討究變法事宜五曰宜詔全國盡去滿漢之意見均以扶持國家爲要義六曰宜與歐美各國商略扶持地球太平之局茲數語雖亦人人所能言然以弟思之今日轉旋全局之要非此不可弟誠知言之驚人又誠知意見難融人才不足然不能不言者以己爲茲土之人何忍見瓜分之慘禍公實同此意能否竟以此意婉達榮相之前若夫新政措施之宜及先後布置之法則弟前有中國自強策三篇印入時務報似已撮其大綱語曰狂夫之言爲聖人所擇良醫所用卽庸醫之藥道在舉動得宜而已所願當局勿驚其說之奇亦勿嫌其說之陳行之以斷施之以漸何患事不成功不立耶若夫日旰路歧病深藥亂非意見之各執卽勢利之是趨如此則真不可爲矣謹布區區望照答不一

致劉幼丹觀察書

屢聞陶七彪兄緬述風概始知先生蓋古之豪傑人也西川疲困之餘得先生與諸賢達董而理之庶其有豸先生舉動類有奇氣兼之志意闊大識度闔遠世爲人治人因世出良不誣也近今大道凌夷人才晦沒巖牆槁木人知其危譬之大廈風霜凋其外蟲鼠蝕其內一旦有飄風驟雨則處其中者殆矣今吾人同處此大廈之中覩此頽剝能不動懷今不敢極言深論但以吾人同爲此種同居此地縱無專權厚力必當各盡其所有之權力推而廣之合而施之如此則自匹夫以上無不有應盡之責矣若夫爲一省之長吏圖維新之盛業雖不能不拘牽成例顧忌一切然權力則固已厚矣顧近日各省大府發憤新猷者不勝僂指而或則志在聚斂或則僅事補苴進乎此者能知辦武備礦務機局諸事然躁急而無序倉猝而病於雜者比比也有序矣不雜矣然前作而後輟彼倡而此不和又在在皆是如此則功皆枉費事實鮮效雖糜金巨萬聚一時人才而謀之何補於事竊謂四川地形最易爲力然風氣僻陋士庶民情且

嗚匪在在皆是若督撫果有意於是則宜糾合官紳商所以振興之策必當酌之至當而行之以序察之至精而爲之甚勇意宜首開日報以開風氣次辦商務礦務（以獲利最速者爲上）以擴利源稍能獲利卽開鐵路以捷轉運於是開學堂以儲才鑄鎗炮辦團練（用西法不曰練軍而曰團練者以可歸紳辦也）繪輿圖以爲將來固守之計（以上所言甚略且未盡當略存大意而已）此爲留遺吾黃種之苦衷非敢妄言也若懼後人不能繼志則莫如辦紳權（紳非專指本地人也凡一時招集外省本省人皆在其內）使紳所辦之事與官劃分凡商務團練學堂報館皆歸紳辦官不得過問別指款項歸紳收用且有議事之紳有辦事之紳又有監察之紳如此則不致廢於半途且有益於事他日有警則保一省易易也先生亦謂然乎康年薄劣無似又與君東西不相值而輒敢縱言者以先生知陶君或亦不咎康年也別有箋上鹿制軍以微末不敢多論先生若是弟言者乞以此意達制軍也

致高□□先生書

前聞吾丈辦理農工商礦局將考究利弊所在詳審而布行之將來浙民得以裕衣食之源而免飢寒之苦咸君家所賜也惟近日某報載有劉口口與意大利人訂辦浙江全省礦務一語未知確否竊謂朝廷設礦局之意蓋欲爲小民裕衣食之源而免利源之外溢也謂宜先鼓勵華商合股辦理必不得已而招洋商亦宜予以限制若官設局而亦將全省或數府包與洋商則何以上對朝廷下對全省商民乎各省辦礦之法自以湘省爲最善而江西次之浙省紳民宜不後於二省仿照辦理宜無不可若訂與洋商名爲合辦實則賣礦也以一人權力而包攬全省之礦以售之外人則優爲此者多矣何用官局爲之乎且金衢四府已包與外人矣一之爲甚其何可再吾丈承斯重任實宜力爭上游爲子孫造福前口口大兄嘗謂今華人既無巨貲開礦與其輕棄地利不如使外人辦理猶得於國課民生兩有裨益康年謂此說誠然然以正經礦法而論卽使准許外人開採亦宜詳採各國良法每礦限若干地每商限若干礦庶少流弊今若由私家得其厚酬而輒將數府之礦包與一洋商不特大失利源且

於外交上亦大有關係且洋商所以肯出此厚酬者必其所得之利什百倍於此而後可也如貴州之礦由陳哲甫訂與戴瑪德陳之所得不過一二十萬而已逮戴轉售與瑞記洋行除獲得現銀數百萬外月得酬薪數百金準此以觀則瑞記洋行所得又不知當有若干萬萬然則吾國之人何苦而爲此乎此如不肖子以家中宋板書竊售與人每箱得一二十元自以爲妙策而不知書賈所得輒有數千也康年在申亦時時有洋商來絮聒欲訂約辦鐵路礦務其所允酬貲無不甚厚然而終忍而不爲者蓋謂與其得貲財而爲子孫之羞貽家門之玷無甯守其寒儉之素也康年棲遲海上本不欲多事以夙承賢喬梓之愛特貢其愚不知得蒙採擇否

致蘇松太道袁海觀察書

敬啓者近見各報載耶松船廠工人被美國兵船水手打死一節雖已向美領事署控告惟原告無力未延狀師經美領事令署中人代爲伸辨竊謂此事極有關繫若聽美國領事自爲處置難保無畸輕畸重之處意謂閣下辦理交涉



極宜就此等事力爲扶助俾以後華洋案件易於辦理且近日洋人魚肉華民之案層見疊出似此案尤萬不可放鬆以爲懲一警百之計似宜由閣下設法代請狀師向美署伸辨目前雖覺多費然於辦事上爲益不淺聞担文仍爲南洋律師此案重大何以絕不顧問管窺所及謹旁及之敬希鑒核

致唐傑臣先生書

近來通人策中國者均以興學培才爲第一義邇聞泰西教士李提摩太力持此論請閣下暨徐雨翁籌募款項設立學堂苟觀厥成誠盛舉也然此事關繫極爲重大設立學堂培植人才乃吾中國人之責今中國人不爲而轉使西人爲之是教育之權全入西人手矣且學堂旣爲西人所立則爲學生者必服膺其所尊將來宗尙何教恐不可問其弊一教士設立學堂必有偏重之處試觀上海諸西人所設學堂中學旣全無門徑西學亦僅得皮毛其弊二卽謂款項充裕教科之書或可精美然於華人質性合宜與否彼不辨也必至程課迂闊事倍功半其弊三至於華人而受西人之栽培必至供西人之驅策假西人之



權勢流弊尤不可勝言是則西人在吾華創辦學堂雖西人之美意而非吾華培才之上策也吾華培才上策惟有將此事仍歸華人自任或謂集款不易則試以上海一隅計之殷實紳商奚止萬家若按月捐一元以萬家計則已得萬元以如此巨款何事不可舉辦所患者無結實辦事之人無竭力提倡之人故人不能信從耳今閣下既負先達之望而貴同鄉人又素來急公好義爲世所稱倘得閣下提倡而勸喻之當有睠懷時局力任斯事者若謂華人認真辦事熟悉學堂之人少則不如遴選誠實之士人至日本考察其初等教育之法歸而立小學堂期以三年畢業再往察其中等教育而立中學堂亦期以三年畢業更往察其高等教育而立高等學堂亦期以三年畢業其開設之多少以經費之贏絀爲斷如此辦法則經費以徐而易籌且行之數年若果有成效可觀則籌款亦較有把握所操者約所推者廣所培者厚計似無便於此質諸高明以爲何如倘以爲不謬謹以提倡之任望諸閣下總之學堂之事中國不能自振作而由西人主持實吾華至恥之事想閣下素以興起後學爲懷且極知與

外人交涉之道當不以弟言爲迂闊也

致吳授卿先生書

去冬自東還諸友人咸稱足下成就益進志意益堅不禁拊掌雀躍以喜深冀將來翺翔天衢有所建樹世事變換有若浮雲不須頃刻恐卽改觀正不必以一時之事爲意至鄙人所望於足下及留學諸君者在能在黑暗世界中辦事若以得離黑暗世界爲樂而轉戀他人之瓊林玉樹瑤草琪花則豈鄙人之素志哉來書爲留學生辨誣一節閱竟不勝悵惋蓋誠恐報中之言偶一不慎有誤吾國文明之機而阻遊學諸生之意興也因復取十二月十四日報章閱之則其指稱之中實寓分別之義且實參諸衆說並非偏信一人其行文中期望之意甚多詆謫之詞絕少未復有存疑之語無吹求之文竊意留學生人數既多自難畫一小德出入或不免且所指之過皆係意氣情慾之事少年跳盪殊無足怪報中之所以指摘者蓋欲諸生於此事自加防檢免爲外人所輕視貽異己之口實且卽使無之而存此以自鑑亦復何礙蓋吾輩所厚望於留學

生者在能刻苦力學爲有用才其尤者更能恢廓志意以卓犖之姿成絕特之才能乘時機著大功業非僅以其名目之可聽能作一二新學話頭已也頗聞此次留學生中有若干人因日報之語勃然口怒詆詬百端殊不知日報之職在能糾彈全國之非違激發大家之志意故上自政府下逮黎庶苟有不然無不盡力抨彈直言無隱其意無他欲盡日報之天職而已故雖遇大力壓制未嘗稍貶今留學生中於此等鄭重期望之議論猶相詬怒試問此等驕亢浮囂之氣亦何足以凝意氣而成事功此之關係殊非淺鮮因足下之函聊復直言切望足下與諸留學生能以此相勗勉不勝大願

致藤田劍峰先生書

名豐八

昨承寵召珍甘駢羅半席以後兼出雅奏使弟亦得在傾耳之列甚致欣感顧弟竊有獻疑者古人設教不廢絲竹然是以此使生徒習之足以陶寫性情非欲以娛賓客也後漢馬融設帳後堂有絲竹之聲此則出師所自辦非令弟子作也至若賓主之間飲酒歡樂欲以音樂相娛則當主人先自奏然後請客奏

又或客自欲爲之以畢歡此皆燕游褻狎之所有事不足爲怪若謂樂器新異  
貴邦人欲一驗視則當可擇日相約詣其處同肅聽之師弟之間雖不必拘此  
亦當於友朋清談時使之出奏若夫酒闌客醉忽使列坐座隅奏其新伎是直  
以優伶蓄之而已嗚呼今做國當衰微之時上之教化下之師法皆稍衰息故  
弟等延閣下來茲土爲東文學社教習方冀閣下以貴國師範之道表率後進  
而閣下平日所自處及敦厲後學者亦頗足使弟等起敬今乃有以優伶蓄弟  
子之事則於閣下聲望似稍有礙倘訛傳稍甚必將謂弟等優伶生徒以娛東  
友則弟等之罪尤萬難辭矣然以閣下事出無心又平日頗不薄弟故敢貢其  
區區自附於朋友規過之列不知閣下亦許之乎

再致藤田劍峰先生書

前日羅先生來傳閣下意旨弟深佩閣下之能屈己以容弟而又恨弟之褊狹  
遽以微事開罪於閣下也日日欲過學社致謝而近日事頗冗不及走謁罪罪  
禮俗同異致啓疑怪事常有之擬研究貴國風俗著之簡編以便將來民間交

際有所依據今日又奉手書深責弟不應別函責備唐生兄弟以為弟不識事體弟愚闇發於一時之躁怒遂峻辭以責兩生弟之冒昧事誠有之敢任其咎惟閣下以兩生為無罪則弟未盡謂然矣閣下以使弟子侍坐奏樂為可為之事則在閣下命之心中光明無可為責者弟之妄言誤矣若夫彼唐生者年在弱冠內外且嘗讀書固知吾俗以奏樂酒座為可恥之事矣而欣然樂從不謙辭以謝是可謂忘廉恥矣夫兩國人相交當各從其國俗是公理也亦公法也譬如敵國婦人以著衣為敬西人則以袒為敬假使吾國婦人與西人周旋亦相與袒焉得不為旁人責備乎弟深惡近日華人惟勢利是趨而廉恥蕩盡故欲借此以懲之想先生必以為然而許之也倘閣下不諒其苦衷而猶欲峻責之以為快則非弟所望於先生矣

致唐□□□□兩君書

敬啓者弟等去歲與蔣羅二君設東文學社於上海承荷不棄翩然來學弟等頗相欣重雖未得握手然固心仰久矣然竊有異者昨夜教習藤田君飲客社



中弟等亦得與座酒半忽見賢昆仲攜笙簫奏於座隅再三不厭試問此等舉動賢昆仲果以何等自待乎又試問賢昆仲離家來習東文抑將卽是以進學日本各種學問以効用國家乎抑將以音樂娛師及師之友乎凡人必自侮然後人侮之度賢昆仲平日舉動必有輕褻之處乃有此非禮之命否則師不宜以是命卽命亦不宜應也又人必以禮自處乃能有以自立若不問應否而率然以應命爲樂且以諸客見賞爲榮不審將來應事接物將何以自立乎嗚呼吾中國人見侮外人久矣然要之自有啓侮之處乃至見侮如此之甚凡人皆然非獨國家也弟性拙率竊謂兩君盛年向學不宜有此俳優自待之事以嘗與聞學社之事故敢貢其區區當蒙見容不相責也

致□□□君書

姓字無考

愚常謂今日出洋留學生宜暫勿問時局惟一意堅苦學問俟學成歸國再深察時勢所趨及可依恃之人而展效其才力切勿於此向學之時而棄之以從事於辦會辦報及一切遠莫能致重莫能舉之事然若輩往往樂於張舉又爲



他人醜譽大言所惑致流入浮囂一路良深浩歎惟現在京外大老直以留學生及內地之少年喜事者爲皆革命之流且以凡立異論者爲皆應誅戮擯絕而又以誅絕新黨爲快心之事竊恐如此則浮囂之風去而一切振興勃發之意氣亦盡行遏絕又恐行之不慎或轉以長醜類之心固私黨之勢將來意見相激疑伺愈甚而滿漢新舊官士之讎愈以糾纏而不解言之實可痛心愚謂此等事但宜解散不宜竟與爲敵並宜擢用其正直有用之人而留學生宜寬與出路如此則其中有才者旣以得所展效而絕他念其奇零無用者旣失所倚何能有爲此抽薪止沸之說也顧尤要者則在朝廷能實行變法自強之說使大局鞏固異念自絕此則固本之言吾輩所爲日夜焦盼而不能已於言者也

上海图书馆藏书



A541 212 0014 5647B

E14002



